


0 10 20 30 40 50 60 70 80 90 100 110 120 130 140 150 160

Inches

Centimetres



1879-23
754
2

Kodak Color Control Patches

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30

傳 67423
754
22105
2册

霍文敏公石頭錄原編

門人 五河沈應乾註釋
江寧何世守參訂

十三年甲午 是年公四十八歲 正月朔一日戊戌午發蘭溪西駐

二日未發嚴州三日已嚴子陵祠西桐江

桐江有子陵釣臺後人吟
咏積久成集公爲序之

四日富陽五日浙江陽明書院

六日吳山張楊兩御史餞湖上寺王給事盧王兩主

事餞北關七日已發北關駐洪里八日午崇德縣西

石門鎮九日已桐鄉縣十日嘉興十一日松陵

十二日姑蘇

蘇州賦糧繁重 公屢疏其弊過蘇州
知府王儀請均糧法 公復書載集丙

十三日巳錫山是日七男瑛生刻丑十四日巳常州申

奔牛巡司十五日丹陽十六日京口十七日申瓜州

十八日至二十二日磚廠二十三日廣陵二十四日

午鄒伯高郵二十五日未界首戌寶應

二十六日午淮安馬都憲餞宿二十七日過信字埧

宿青子步二十八日清口驛西三議鎮巡司二十九

日巳桃源西崔鎮三十日辰古城未宿遷西芬山路

口

二月朔一日巳直河酉邳州二日未新安戌房村三日

辰呂梁酉徐州四日耿山五日巳至夾溝酉謝溝聞

六日未沛縣戌雞鳴臺七日辰至沙河戌玉皇廟八

日辰至魯橋戌新店聞

九日辰濟寧朱都憲餞酉天井上十日戌分水龍王

廟十一日辰開河西安山十二日未荆門十三日巳

東昌酉青陽十四日巳臨清戌渡口丑甲馬營十五

日酉地埧潭十六日辰梁家庄是日阻風戌至安德

十七日寅良店酉連窩進神箭有疏

邑人節庵胡禮昔為松藩兵備副使值番夷據險為
患官兵不能進討乃製神箭攻之一日而五寨悉平
大同叛卒自嘉靖三年殺都御史張文錦益多驕蹇
至是又誘小王子數萬人寇大同寨故公進胡禮所

製神箭備用請
下兵部試驗

十八日寅新橋未磚河西滄州子乾寧十九日辰流
河未奉新戍楊青二十日巳天津酉宿桃花口二十
一日酉楊村二十二日河西務二十三日阻風宿靳
家庄二十四日未和合酉宿落家營二十五日未至
灣二十六日至鍾家二十七日宿東朝房
二十八日朝 見進謝 恩疏

閏二月初二日涖任

吏部舊弊凡黜陟除授官員惟郎中題奏具草呈尙
書行兩侍郎有不預知者公謂汪誠齋太宰日凡四
司題奏具草宜先呈右堂次呈左堂次呈正堂事理
可否各以聞見叅酌汪太宰深以爲然行各司郎中

亦令該吏每事先白主事員外僉同而行自是侍郎
及員外主事始不稱伴食矣楓山章公懋以祭酒致
仕起爲侍郎尙書不就卒其子接乞廕公請於首相
日論例則二品三品未經考滿且不能廕况未蒞任
乎若以章楓山碩德正學爲世大儒使其後人獲沾
一命以奉祭祀則我輩責也首相然之接陳奏下部
公爲覆題送太學愿仕南雄大守
公之崇重先賢力行古道類如此

十二日有書與兵部官回辭朝晚宿瑞光寺十三日
宿康陵十四日還京

十六日復 命

三月朔一日丁卯

四日上大同事宜疏

時官軍圍大同攻奪關廂叛卒大懼斬首惡出獻有
旨會同多官推賢大臣往大同賑濟及查勘功罪公

因上疏言
其事宜

二十二日餞黃久庵侍郎于北郊名

黃侍郎奉命賑大
同嚴功罪九卿郊餞

四月朔一日丁酉

二十日丙辰移玉河寓餞方西樵于南河

方西樵屢乞休不允乃托大學士李敘庵為請始許
暫歸養病西樵方卧得報遽躍地呼曰吾得稅駕矣
趨詣敘庵謝曰幸獲山林公之賜也異日主上詢
及幸為具言廢疾不堪用狀公餞行作水調歌頭贈
之詞載集中西樵極被寵眷在閣僅二載年未五十
急流勇退視去相位若脫敝屣近世所罕觀也公志
與西樵同然屢疏不得歸乃嘆曰此豈
牢籠鬼坐命耶山中之樂讓方西樵矣

五月朔一日丁卯

二日考績通詹事侍郎考三品二年滿

十六日本部引奏

十八日奉旨復職

十九日謝恩是日請祖考妣定蔭得與球吉

公家中自合巖以來田土布粟皆伯兄振先主之至
是擇蔭公曰祖宗福澤不敢私吾子吾子勿預與重
宗子也當官之以奉祭祀第重材不堪官乃自重弟
與球以下諸姪十數人書名至筒中告于祖考卜之
得與球吉奉旨入監讀書後
歷仕三十年所至以廉慎稱

六月朔一日丙申

十三日南京太廟災詔大臣四品以上自陳

七月朔一日丙寅

四日己巳上災異自陳疏

留都太廟災公乞罷黜以答天戒疏內言四事一曰蘇松稅糧之重二曰徐州夫役之累三日王府祿糧之弊四曰東北兵防之疎皆引為已咎求罷不允

八月朔一日乙未

九月朔一日甲子

十月朔一日甲午

十一月朔一日癸亥

八日庚午冬至如 景陵 獻陵

六日出京九日回是日黃致齋同論學名宗明

黃致齋公同年友也當張桂倡繼統之說舉朝詆之致齋獨曰繼統三代通制繼嗣者王莽做議我朝

純法三代公侯伯軍職承襲或弟繼兄或姪繼叔皆曰弟曰姪不曰子公侯伯如是 天子何獨不然乃附名于疏卒正典禮致齋講陽明之學日致良知日知行合一與張甬川侍郎異及黃卒公為志其墓日致齋下世子失一良友矣

十二月朔一日癸巳球等山中啟行十六日宿部

公在部見百官考課冊職官多以家人行賄敗因為書戒兄弟書載集中

十四年乙未是年公四十九歲春正月朔一日壬戌

二日考察天下官

時公以侍郎佐詮政廣諮博訪仕路一清

十二日癸酉畢事回玉河

錦衣衛鎮撫司吏胥倚勢作惡莫敢誰何本月初八日進士陸子明乘馬過門輒喝下馬子明日此間寧

有下馬碑面耶各吏扯下將家人揪打訴于法司法
司不敢問公考察事畢子明乃詣公訴之公行拘只
獲一人餘皆逃同原籍公移文各省巡按御史盡速
赴京正其罪縉紳稱快自是錦衣吏儼儼知檢矣

是月 莊肅皇后崩會議諡號

上詔諸大臣議諡少師張羅峰曰宜二字四字少師
李敘庵曰須得八字左都御史王浚川曰 莊肅作
配 武宗今日之諡似應一體公曰 武宗廟諡既
與 列聖相同則 莊肅諡號豈宜有異十二字之
諡乃累朝事例今日所當遵者若上冊行禮自當別
議儀節以避抗尊之嫌奏入 上覽不悅曰朕受命
在位茲遇 皇嫂之喪無有事嫂如事母之理矧
兩宮在上而 昭聖皇太后有母道所壓尤為未便
再詳議以聞於是成國公朱鳳等皆曰宜且據諡法
二字以表稱懿行俟他日再加徽號以備全典得
旨諡用六字曰 孝 靜 莊 惠 安 肅 毅 皇后

二月朔一日壬辰三日甲午陳少謙至

六日丁酉有事于

太神殿捧 仁祖皇帝主

凡大臣捧主至神座前內臣請主轉與大臣捧至祭
所公受命捧 仁祖主內監麥福公鄉人也有家僮
與福同姓福聞之欲與認
宗公不許往立遣歸嶺南

三月朔一日辛酉

乙酉球璋璞瑕珉玳璆至

時 上早朝勤政每四更吏報長安門開則家人起
具茶粥報午門開公起盥洗五更入朝味爽入部申
刻歸第考諸子學業同讀書二鼓乃罷隆冬盛暑不
輟每日人生有幾箇夏之日有幾箇冬之夜好勉學
及時也宅內惟呂老二氏一婢一媪供炊爨日食惟
蔬菜呂氏即瑛母老氏即瑞母相從南北游宦二十
年無金飾
無絹服也

四月朔一日辛卯

二日壬辰張羅峰謝政得 允三日癸巳行

公同羅峰立朝八年議論大政各持所見不相阿比議者遂謂羅峰與公先合後忤蓋狗迹之見也公嘗謂呂涇野侍郎曰羅峰毒余甚多摧余甚力皆意見不同余亦毫不假借遇事則爭爭後釋然久之羅峰知余無悻進之心余亦知羅峰只見偏度狹終無他也

五月朔一日辛酉

二日壬戌饒蔡半洲中丞郊南名饒錢桐溪司馬錢

家名如京

十六日丙子再饒錢司馬南郊

二十一日辛巳郊視牲

二十三日陪北郊祀

六月朔一日庚寅

七月朔庚申

十五日饒林小泉尙書南郊名庭楊是日覆言官戴銑

等疏

二十一日庚辰郊迎費公名宏

正德以來內閣權益重諸侍郎不敢抗禮楊邃庵費鵝湖皆以先朝耆舊居首揆公每敘坐未嘗隨眾過遜視之猶六卿然諸侍郎遂不偕見

二十四日癸未言官薛宗鑑劾太宰汪公名鏊

八月朔己丑尙書夏言疏進內臣一萬有奇

張羅峰柄政十餘年與公日夕議革除鎮守內臣殆盡至是夏言進一萬四百員列三等上等等四千七百員皇城供役中等海子聽用下等月給米三斗聽缺公竊嘆曰唐元宗時用宦官二千七百員史以為譏今進一萬有奇可為寒心

九月朔己未

四日壬戌汪公致仕

時汪誠齋寵遇日隆以大家宰兼理大司馬夏宗伯言忌其軋已且修舊隙遂喉言官交章攻去

六日甲子奉 旨署部事

公欲權歸 主上自用京堂大臣時會推吏部尚書公乃題稱嘉靖六年禮部尚書桂萼改吏部八年方獻夫改吏部十年兵部尚書王瓊改吏部十一年兵部尚書汪鏊改吏部俱出獨斷不俟會推 奉

旨簡任大臣自君古道時昔不同朕無知人之明用所

弗稱况人言凡事不如舊爾每只照舊例推來用

公復上請云查得吏部舊例六部大臣皆有朝廷特旨簡任則知京堂擢用不專任吏部可知也舉用之權不可出自臣下云

奉

旨爾每說得固是如今人心不同有旨着會推只盡眾

人所與者寫將來點他

嗣吏部同廷臣先後會推三次皆批再推兩員來看所推尚書羅欽順梁材夏言唐龍王廷相等八人皆不允 上意蓋在公而廷臣拘資格故推不及蓋除授吏部尚書例俱由別部尚書或左右都御史轉任未有以侍郎超擢故也 上令科道官各舉所知者一人以聞給事中董進第御史王祚等惶恐上言

陛下神聖延臣無不簡在 上心者非臣等所敢妄
議 上怒切責六科十三道掌印官盡褫職為民時
戶部尚書許松臯居憂 上乃特旨擢為吏
部尚書令其服闋交代蓋欲公久署部事云

上擴大公以贊 聖治疏

公屢言吏部權太重至是署
部事復言吏部權重之弊

覆于巡撫自陳疏

時吏部因循舊弊凡科道官彈劾必扶同覆日與本
部體訪相同無有為辯明是非者公每曰言官許風
聞言事各部未有許風聞行事者凡有彈劾必查積
年保薦考語以對山東監察御史郭圻論劾巡撫于
桂公乃覆題列于桂自任知府以致叅政俱上
上考今于桂因人言乞致仕例該請自上裁
奉

旨于桂不准休致着照舊用心巡撫地方

十三日辛未餞汪公于南郊

二十四日壬午進乞昭聖斷定禮儀正中垂式臣工
遵守疏

孟冬祫享 太廟 上命公及顧侍郎鼎臣捧主太
常寺傳報時公與顧侍郎有期功喪公疏言期功喪
服避吉禮宜也然已踰月似無容于避乞
賜裁定俾臣工永遵有 旨不必迴避

十月朔己丑有事于 太廟捧 孝宗皇帝主

九日丁酉會審獄囚

十一月朔戊午

十日丁卯夕夢對 太祖皇帝

十三日庚午從 上視牲南郊

十七日甲戌侍 上郊

十八日乙亥冬至 上有事于奉先殿捧 孝宗皇帝主

十九日丙子侍宴奉先殿

十二月朔丁亥

二十日丙午禘捧 武宗皇帝主

二十八日甲寅 上祈雪于奉先殿陞遣獻風伯賜 胙有謝疏

三十日丙辰 上有事于奉先殿捧 孝宗皇帝主

十五年丙申 是年 公 五十歲 春正月朔一日丁巳入 賀

二日戊午謁先師四日庚申八兒璿生未交春尙作

乙未巳丑庚申丙子十二日戊辰雨水冰

二月朔一日丙戌

十六日辛丑郊饑倫白山劉昊孚

三月朔一日丙辰

十一日丙寅上待罪疏誤攝衣衽

二十一日丙子從 駕謁陵二十七日駐沙河二十

八日如西山酉至自西山

西山卽銀山時同遊者蔡學士昂廖學士道南黨都憲以平劉府尹淑相公和杜少陵秋興八首諸公以爲忠君愛國憂深思遠不減少陵云

四月朔一日乙酉十日甲午女順生

十三日丁酉陪大禘于太廟

十九日癸卯扈駕長陵

二十五日己酉女良生卯時二十八日壬子駐沙河

二十九日癸丑至自沙河三十日酉刻金土星相犯

五月朔一日乙卯七日大選

二十二日丙子視牲南郊

二十三日丁丑陪祀北郊

六月朔一日甲申

五日戊子上慎選科道疏

時科道官缺請考選當疏上時上方習字因以御書肅武二字賜公并手詔論科道積弊

上降旨云給事中御史係朝廷耳目之官近年所選多是浮薄新進之士輕率妄為有乖政體今次考選改授務醇篤老成知事體的不得一概濫用公因再上疏

奉

旨爾每說的是近來科道官用非其人假公報私顛倒是非以至動搖國是考選固要文字平正通達還要訪他平日存心制行果端方平實不是險詐詭異的任用今次只從公照常考選試卷不必封進推官許仁卿等依擬行取南京官罷

公得旨嘆曰真英主也
蓋謂文字未足以盡人也

十九日禮部會考儒士二十八日大選

二十九日壬子陞南京禮部尚書

時公與夏桂溪相揭夏方嚮用以留
都六卿爲宿德所居故擠公於外

七月朔一日甲寅

十日禮部尚書夏言奏辨府尹劉淑相下獄

福建藩司循舊例解銀六千到戶部發順天府給坊
廂富民府尹劉淑相謂富民初徙時宜給富民立籍
後不宜給遂廢例不行通判費完尚書夏言親黨也
爲關說于夏求必給劉不許監生周禎亦劉親富民
夏昇恃其兄景爲東廠主書詐以金二百投禎假日
爲囑府尹禎入言之劉叱出昇輒奔告東廠逮禎備
諸毒刑夏思中劉
陰令連及故下獄

十七日燕郭武定庄

二十七日上乞賜罷黜以避讐嫌疏

府尹劉淑相公同年也夏尚書與劉奏許疑公右劉
疏中論劉遊銀山大不敬然倡遊銀山者公也言意
實侵公公遂
乞罷疏上

奉

旨卿扈從大臣自當朝夕君側乃恣意私遊猶辯飾已

過念昔忠於事免究

二十八日辛巳劉府尹奏夏言贓賄

劉淑相被誣玷知夏言主使不勝其憤遂奏夏言囑
托納贓數十事上知淑相言不妄意欲兩全乃
詔不問淑相事而言贓跡
亦寢獨淑相坐許大臣免

八月朔一日甲申

二日乙酉謝尙書 恩

公凡有升階無不累疏力辭至是升任南京禮部尙書夏桂溪意 公必不拜命欲指 公爲怨謗 公以爲榮寵皆操之 自上遂受職謝恩

十一日甲午上申明禮制疏

留都六卿多屈體科臣以免彈劾相沿成習科臣遂蔑視六卿街衢相遇混肆唐突尙書劉龍潘珍兩驛馬會鈞亦劾劉龍和買貨物故公於陞秩之初卽疏言騎馬官員不得僭乘輜及相遇迴避之禮 奉

旨禮部會同都察院看了來說

二十五日 陛辭有疏

二十六日上照察奸黨疏

公上申明禮制疏尙書夏言陰令科官肆辯公知其謀故疏言之夏言聞之上疏力辯遂引嫌不敢覆公禮制疏推兩侍郎與都察院會議 奉

旨朕已有旨大臣羣僚之首各同寅贊治勿相詆擊如何又這等來說且不查究

先是廖侍郎道南劉府尹淑相並奏尙書夏言罪過給事中錢薇上言大臣不宜忿爭 上是薇言而令大臣各務同寅贊治 適公疏上故有此論

二十七日辰出京鄉年僚餞于郊戊至灣宿新河口

公六月陞秩至是始行或曰是何濡滯也公曰孔子言遲遲吾行孟子言於予心猶以爲速彼豈有貪戀於其間子之別父徘徊願望乃天性之不容已况臣之別君從此永無見闕之期乎庭有兩柏公手植也作兩柏歌焉

二十八日駐油店二十九日阻風申發油店酉至理義寺宿

九月朔一日癸丑卯發理義寺下五十里遇何粹甫主

政名中

午至和合驛至河西驛宿二日辰發河西未

至楊村驛酉至桃花口宿三日卯發桃花口阻風未至天津衛戌至楊青驛宿四日申至奉新酉至常屯鄉五日午至流河驛酉青縣亥至乾寧驛六日午至

滄洲西至磚河驛亥至馮家口宿七日申至新橋驛亥至油房口宿八日午至東光縣阻風亥至連窩驛宿九日午阻風駐馬家庄十日午至良店戌至德州安德驛宿十一日亥至梁家庄驛宿十二日戌至甲馬營驛宿十三日午至武城縣西渡口驛亥油房巡司宿十四日申至臨清州宿十五日酉至青陽驛亥至梁家閘宿十六日未至東昌府戌至周家店閘宿十七日未至荆門驛戌至沙灣舖宿十八日未至安山驛會劉都憲亥發安山閘十九日巳至開河驛申過分水龍王廟戌至柳林閘宿

二十日寅發柳林間十里阻雨駐獲麟古渡未至濟
 寧州會李都憲二十一日午至魯橋驛戌至穀亭鎮
 宿二十二日午至沙河驛酉至謝溝間宿二十三日
 巳至夾溝驛酉至秦梁洪二十四日巳至徐州彭城
 驛阻風二十五日阻雨駐徐州二十六日午至房村
 驛酉至新安驛宿

二十七日卯新安遞運所辰至邳州午直河下三十
 里遇于都憲名湛酉至宿遷縣鍾吾驛宿二十八日卯
 至古城驛午至桃源縣申至清河縣亥至清江浦宿
 二十九日巳至淮安府淮陰縣驛會周約庵三十日
 申寶應子界首驛宿

十月朔一日癸未午至高郵酉至邵伯驛亥灣頭巡司
 宿

二日巳至揚州府廣陵驛會王尙書名軌

三日午至儀真縣會王蘗谷都憲名大用酉宿江口四

日阻風至于七日駐江口

八日申至龍江驛亥宿清江版是日部院覆題申明

禮制疏奉

旨是南京大小官員務要崇讓遵制有故違的叅奏治
 罪

左都御史王廷相與禮部侍郎黃宗明張璧會議公所申禮制詳據會典覆奏乞敕兩京諸臣四品以下皆宜乘馬不得用轎六科給事中途遇部院大臣引馬遜避違者部院糾正上遂降旨戒飾

九日辰入城巳謁 陵午寓禮部私署

十一日有 旨降俸一級劉府尹事註累

十二日蒞任

十三日謁文廟

二十七日進正旦表

二十八日聞 皇第二子生

十一月朔一日癸丑率百官賀 皇第二子生

初四日進慶賀表十四日丙寅月食

二十六日齋戒于部

二十九日冬至謁 陵

十二月朔一日壬午五日考篆文生

七日戊子 詔書至

十八日己亥進賀 皇太子表

閏十二月朔一日壬子

十八日郊餞陳都憲名金

霍文敏公石頭錄原編

門人

五河沈應乾註釋
江寧何世守叅訂

十六年丁酉

是年公五十一歲

正月朔一日辛巳謁陵

二月謁文廟

十二日壬辰進薦文職疏

疏內共薦四十餘人楊慎豐熙鄒守益夏良勝唐樞劉仕徐文華皆大禮大獄得罪者也

公薦武臣疏

疏內薦叅將沈希儀程鑒崔天爵都指揮韓平孫昂芮傑及罪廢邊將趙廉時陳等八人

上正風俗疏

是時南都送喪出葬用鼓樂前導僧尼混襪郊外設筵賓親駢會男女聚飲侈靡相誇喪葬甫畢家已空

乏致有停喪數十年不葬者婦女送喪治容麗服惡
少聚觀禮教蕩然公有諭禁止復疏言其事請 敕
禮部會同都察院申明禁諭又南都尼僧視各省尤
盛尼僧外假清修內實淫恣有暗包奸僧袈裟莫辨
招婦女恣肆奸淫或惡少竊伏庵院潛通奸宿公乃
行五城示諭地方凡尼僧庵院盡籍于官尼僧年五
十以下聽擇配偶五十以上還俗依親無親可歸者
送養院收恤庵院銅像送工部銷毀木像坭像悉從
毀撤庵院銅鐵物器聽尼僧自利庵院木料地基召
民承買價銀給尼僧還俗為衣食資三月之間毀寺
觀庵院數百所但勦威勢家所叙庵院尚多庇護公
復疏其弊乞 敕禮部會同都察院申明禁例庶風
俗永 正云

十五日乙未 九廟禮成及上 兩宮徽號詔至

上嘗因少保夏言之議更郊祀建四郊矣復以太廟
之制同堂異室原非古禮欲更正之言輒獻議改創
九廟奉 太祖居中 太宗居左前 宣宗以下六
帝分列左右更 皇考廟日 獻皇帝廟 昭聖太

后 章聖太后並上徽號大赦天下後四年
羣廟災 上降罪已寬恤之詔遂復舊制

二月朔一日庚戌三日神樂觀演丁祭樂

六日乙卯賀 九廟及 兩宮徽號表

八日丁巳陪祀文廟

十一日正定體分疏

先是都察院覆題公申明禮制疏有 旨南京大小
官員務要崇讓遵制有故違的叅奏治罪時夏言入
內閣給事中曹邁等倚之為重復與公
抗故公因論南都拜祝之禮復申前議

二十四日癸酉進賀 皇第三子疏

三月朔一日庚辰

四月朔一日己酉

二十二日庚午進賀 皇第四子生疏

上定體制疏

上乞賜罷黜以避言官疏

南都科官挾彈劾之權每與六卿對坐六卿皆送上馬至禮部拜表或策馬衝突儀仗尙書侍郎朝服相迎獻茶所由來久矣公盡正之給事尹相憤曰合我傍坐屈辱我也遂誣論公強差侍郎袁宗儒進表誣公怨望公疏明體制遂乞罷黜

奉

旨霍翰不准辭着安靜供職吏部知道

是月禮部覆題定體分疏奉

旨禮儀都只照舊例行六科給事中官道路迴避准照

在京禮體這給事中每如何不行遵守且不查究

旨下留都科臣始不敢與六卿抗往往時各官用燈籠撥更夫和買物件紛紛害民科道尤甚至皆歛跡科道先有欠鋪戶綢緞珍寶重價皆急召補之萬歷中海剛峰掌南臺行公故事盡革民間雜役都人大悅

五月朔一日己卯

三日辛巳齋戒于部十二日庚寅璞瑛等同

公在留都日與諸子講易書詩春秋大義每日詩經乃聖人倦倦以教門弟子日可以觀者今一開卷而興衰治亂之跡宛在目前惟聖人撥亂反正經邦維世之深意未盡發揮耳獄中成周頌註釋至是并國風小雅釋之大雅以北轉而止又每言敘詩次第極有妙理授璞瑛等比璞瑛歸嶺南應試公作古詩七章示之兼戒示山中諸子詩載集中

二十日戊戌雷火謹身殿

六月朔一日戊申

十八日乙丑進待罪修省疏

雷火謹身殿報至公率留都大小官員
青衣角帶修省三日連名上奏待罪

再上定禮制疏

成化中大學士劉吉萬安等陰結言官排擊善類羣
臣不附內閣者嗾言官劾黜天下善類奪氣給事中
馬顯奏要尙書註銷北京尙書無敢違者給事中于
璠奏要南京比照北京註銷南京尙書無敢違者率
用手本職名註銷流弊已久公曰尙書職名惟用于
主上科臣安得而受之厯考典章並無此例况禮部
無斗粟之儲所註銷
何物乎遂疏正之

劾欺隱 敕旨公文疏

先是公申明禮制疏下禮部會都察院議都察院覆
題云查得大明會典云禮部會議民情俱於闕左門
東直房序坐尙書左右都御史等官上坐侍郎副都
御史等官對坐通政司叅議大理寺寺丞等官列於
東房六科掌都給事中列於西房南京文武衙門公
事會集會坐亦如之欲候 命下移咨禮部轉行南
京大小衙門一體欽遵 上可其奏少傅夏言向在
禮部故稽留不行公再疏申明夏陰合儀制司郎中
陳箠削去都察院原引會典一節以助留都科官俾
與公抗公不得已疏奏陳箠欺隱 敕旨一年不臣
之罪一增減緊關情節不臣之罪二有此二罪猶冒
清秩恐百官傲慕成風有 旨下禮部查時嚴介溪
代夏爲禮書懼忤夏
意爲之彌護事得釋

二十二日己巳進 嘉靖二劄奉

旨這本昔年朕已備覽多係浮文如何又來奏該衙門

知道

公嘗謂 上英明獨斷高出千古其於禮部太常之事織悉斟酌毫髮不遺至吏戶兵工諸部理財用人安內攘外等務乃付之柄臣多所忽略倘加意如禮部則何患天下不太平故錄進第二劄至再至三上竟以浮文視之

劾屬官壞法疏

十三年公為吏部左侍郎訪得文選司寫本承差十二名皆納賂營充每名費銀二千餘兩或賄內閣或賄郎中乃遂所求凡馬路驛丞每驛歲送節銀八千兩寫本一二年坐取美官所費賄賂在任取償公與侍郎張甬川議曰各司寫本俱用吏典獨文選司用承差以承差皆富民之子而文選司又選官要地故也遂革之照各司例通用吏典比公尙書留都文選司郎中楊育秀暗收革退承差通賄作弊公疏論其事并劾其先年主唆御史會獅論劾尙書汪鏊獅在鎮撫司供出京師皆知云云

奉

旨這寫本承差事情吏部看了來說吏部覆題奉

旨楊育秀降一級調外用

七月朔一日戊寅

十五日壬辰陪祭 孝陵是日山中書樓火

二十五日壬寅進謝 恩認罪疏奉

旨這事情已有旨發落了如何又來繁奏該衙門知道

邊將時陳由舍人立功陞副總兵以驍勇聞御史王官薦其騎射精絕勇冠三軍堪帥兵守禦從之未幾御史張鵬論時陳賊酷公嘆曰待武帥與文臣不同文臣貴才德武將貴謀勇今內而大臣納賄數十萬外而有司貪贓數萬皆不檢舉獨武臣有罪即窮詰到底皆文官黨大武將所由不振也比刑部尙書唐龍自二邊歸公詢邊將及時陳唐曰驍將也修撰康海謂邊將惟時陳可恃兵部侍郎蘇民亦謂時陳善

騎射有膽略公以唐久於邊唐蘇皆陝西人知時陳必確遂薦之御史胡守中少傅夏言黨也誣奏公假公濟私賄薦時陳公疏詳述之因謝罪故奉旨如此然上自是不直守中矣

應詔獻言疏

是時少傅夏言顯柄吏部考選給事中劉文光等不先關白夏遂票旨劉文光等着別用給事中李鶴鳴以事謫金壇丞五年用吏蔣珊薛冕過賊事發俱充軍鶴鳴乃遣人挾金巨萬入京打點適吏部推鶴鳴陞知縣夏得厚賂輒票旨鶴鳴取回原任給事中遠近驚異公乃疏論之章下吏部既數日上論內閣近日南鄭言事多實宜各加省後夏言遷葬父母乞恩上可其奏復批夏言須竭忠事主聞者吐舌而夏恬不為意

八月朔一日丁未

旨詔京本承差

十九日女信生二十二日迎香帛

三十日宴應天主考官于翰林

九月朔一日丁丑

十一日會審刑部囚

十六日飲徐氏花園二十四日迎香帛

十月朔一日丁未

三日己酉陪祀 孝陵六日送制帛

十五日進正旦表

十一月朔一日丙子

八日齋戒冬至

十一日冬至謁 陵十六日御史龔湜郭本各辯本
二十五日上問安疏

十二月朔一日丙午十七日壬戌慧星見于室宿

二十八日上黜異端疏

時公毀留都淫祠額外庵觀寺院田土拆賣幾盡言
官承權臣風旨謂萬壽慶壽保國延壽等寺皆為祝
聖護國而設不宜併毀君侍郎棟亦右其說公乃疏
言唐宋奸僧誑惑人主故名其寺曰保國曰護國曰
萬壽曰慶壽曰資福曰延福曰崇福遂得不毀保全
至今乞賜 乾斷敕禮部通行天下凡有前項名額
悉令改正不許避忌羣議始息於是將廢寺地
建岳武穆等祠士夫清苦者給寺觀田贍之

十七年戊戌是年公五十二歲正月朔一日丙子

二十一日女謹生

二月朔一日乙巳

三月朔一日甲戌

三日丙子攝祭沐國公

十三日攝祭沐國公墳游牛首山

十六日攝祭臨淮侯

二十九日璞瑕等至岑水南偕來

岑水南公老友也偕公諸子姪至公乃闢見古書院
延有志之士徐元策何世守輩與諸子同學應乾亦
預焉

公大書顏淵問仁章於堂曰此卽孔門教規與告樊
遲居處恭執事敬一也書云視聽言動罔有不欽是
于聖相傳之旨近世言惟顏子獨得四勿秘傳奚有
於是但顏子至明至健洪爐點雪耳若曹只依子蒙

規着實用功

又大書云古今丈夫卓有立於時惟鋼百煉剛斯於慾不屈屈斯昏爾尙毋昏於慾哉剛斯於學不惰惰斯潛爾尙毋惰於學哉

又書云大人與天地合德日月合明四時合序鬼神合吉凶存此心焉耳妄人禽獸奚擇喪此心焉耳可不猛省

又書云懿其詞身心體焉者聖學也懿其詞身心背焉者俗學也毫釐千里今有謂舉業妨德業然則以飲食傷生者必絕飲食乃可以養生耶

又將湛甘泉自然堂銘揭於壁曰諸子熟玩可識道體鳶飛魚躍都在目前又曰自然者道之體勉然者體道之功勿忘勿助即以自然之功體自然之道

四月朔一日甲辰

十三日送制帛餞莫僉事相戴知府嘑

二十七日岑水南回

甘于盤公故人也以才氣自負公素重之貧甚岑水南北上過訪于盤值于盤卧病索筆作詩寄公曰雲淨霜空蘭陣殘幾同心事拊闌干浮生薄命真楓葉早歲虛名類燕翰樵徑久荒烏利跡鐵橋那剩紫姑丹念年錯結西游蝶空憶茶花萃處還公見詩稱賞至再既而嘆曰故人貧病奈何比水南回遂托爲次子與瑕締婚其女歲餽穀百石賜之

五月朔一日癸酉

十二日甲申上清媚籍疏有

旨該部知道

十四日齋宿夏至

六月朔一日壬寅

十日進 聖節表餞胡南山侍郎于普惠寺

七月朔一日壬申七日迎香帛

十三日甲申陪祀神烈山

公陪祀神烈山有人問鬼神因講中庸鬼神之為德章云書稱典朕三禮鬼神其依鬼神無常享易言與鬼神合其吉凶鬼神害盈而福謙知鬼神之情狀皆季路問事之鬼神體物而不可遺者天神地祇山川社稷五祀八蜡人家祖考無物不體也中庸全章皆言祭祀下文宗廟之禮郊社之禮等章又舉其大者言之皆祭祀之鬼神也六經無以天地日月四時人物作鬼神者人物之生安可謂之神死可謂之鬼天謂之帝六宗可謂之神不可謂之鬼故曰神也者妙萬物而為言者也陰陽不測之謂神以鬼神為造化之迹本於此然於鬼字終不安夫子云人生有死死必歸土骨肉為斃乃為野土此之謂鬼其氣發揚於上為昭明著蒿悽愴此百物之精也神之著也是中庸之義也

十五日丙戌謁 陵

八月朔一日辛丑二日演丁祭樂

七日陪祭文廟

十日賀 萬壽節謁 陵

十八日上奉慰疏

上地方疏

上乞養病疏奉

旨卿有疾宜用心調理不准養病吏部知道

上乞致仕疏奉

旨卿昨奏養病已有旨不准如何又有此奏不准致仕

吏部知道

公轉南已決志告休因與科官詰奏每指公怨望故遲遲未發至是三疏連進皆蒙 溫旨不允

九月朔一日辛未

五日餞倫白山徐家西庄

公平生宴賓不作雜劇禮部公宴教坊供應雜劇公悉屏去令教歌雅詩演習雅樂凡宴會皆用之至是餞倫白山於徐家西庄用焉

十二日壬午進長至表

十九日己丑景雲見有賀疏

二十二日進正旦表

二十三日餞張桂濱太常于烏龍津

十月朔一日辛丑十五日乙卯子刻月食

十一月朔一日辛未

六日明堂詔至

十八日齋宿

二十一日冬至謁 陵

二十五日進賀明堂表

十二月朔一日庚子

四日 章聖皇太后崩

十三日王子接思子歌

十六日 尊號廟號詔至

先是四年光祿寺署丞何淵奏言 獻帝宜祔 太廟下廷臣議時公猶未出山張羅峰援古力諍席元

山桂見山方西樵並疏言其非宜乃別立廟至是張桂已卒方西樵致政公出南都有致仕同知豐坊者學士豐熙子也上言 獻帝宜稱宗附廟 上諭內閣夏少傅李少傅顧少保不敢違異禮書嚴嵩遂議上 上帝號為 皇天上帝更 文皇帝廟號為成祖而尊 獻皇帝廟號為睿宗題主祀祀太廟遂配享 上帝于明堂 詔諭天下大赦大禮大獄首罪者猶不在赦例

十八年己亥 是年 公 正月朔一日庚午謁 陵

二日謁 文廟

公講易曰天地之外無道乾坤之外無易通於乾坤之說全部易在其中矣乾天也坤地也乾聖人之德也坤賢人之學也乾聖君也天德王道之全也坤賢臣也臯夔伊周之業也乾治世也坤亂世也是故大哉乾元天德也乃順承天地道也君子行此四者自強不息聖人之德也君子敬以直內義以方外希聖者也故曰主敬行恕坤道也克己復禮乾道也大人與天地合德與日月合明天德王道之全也美在其

中暢於四肢發於事業臯夔伊周之業也聖人作而萬物覩萬邦咸寧治世也陰疑於陽必戰故稱血焉亂世也通於乾坤之說上下四方之宇往古來今之宙皆在其中矣

聖人於復之彖辭彖傳喜動眉宇仍贊之曰復其見天地之心乎此心即貞下起元之心即資始統天之心即萬善之長之心即可欲之善之心惟顏子能存盡此心夫子獨以初九歸焉自其沈潛宥密即淵淵其淵自其藹然太和即肫肫其仁自其統天無外即浩浩其天人皆有此心而牯之反覆遂違禽獸不遠此上六所以凶迷復也孟子發夜氣之論發舜跡雞鳴之論正欲人在一念初起勇決斬截知不善未嘗復行也有志者勉之哉 无妄誠也誠貴正不正雖誠不利世固有學術偏諛識見乖謬者執一不變此大亂之首也故无妄曰大亨以正天之命也其匪正有眚不利有攸往无妄之往何之矣天命不佑行矣哉丁寧煩悉其辭所以為誠而不正者戒意深切矣良其限列其寅亦然 咸九四貞吉悔亡大傳詳發此理乃萬世之常道干聖之心學程子云天地之常以其心普萬物而無心

聖人之常以其情順萬事而無情定性一篇皆何思
何慮之旨唯聖者能之學者無明道天資學力妄意
想像適長猖狂自恣之病故伊川云是有此理賢却
說得太早今欲希此只着實用力貞吉二字二字亦
不外於內止外說內止者嚴非禮之感即中也外說
者無所乖戾即和也嗟夫此豈易言學者苟不苦心
下學而妄曰何思何慮是欺心以欺人也
易上經終坎離而坎離為定體下經亦終坎離而坎
離為變象

三日男與瑞生

寅刻

十七日進賀 尊號廟號表

十八日接 章聖皇太后遺詔齋宿

二十二日奉慰疏

二月朔一日庚子 章聖皇太后詔至是日冊立東宮

七日進香

八日陪祀文廟

十六日乙卯 駕發京幸承天府

十八日餞顧東橋侍郎

名璘

二十八日 駕至衛輝府行宮災

初致一真人邵元節死以陶仲文代之至是扈從南
巡至衛輝白晝有旋風繞駕不散帝以問仲文對曰
當火遣仲文禳之仲文曰火終不免可謹護聖躬耳
是夜行宮果災宮中死者無算錦衣陸炳排闥入負
帝出竟無恙明日敕行在吏部
授仲文神霄保國宣教高士

三月朔一日己巳

十三日辛巳會同年神樂觀

十九日丁亥接東宮詔

二十日戊子遣人如浙江張閣老家

張羅峰致政後兩召起用羅峰輒以病辭至是卒公會九卿致祭遣官經紀其家事呂涇野侍郎不悅貽書相責公慙舉羅峰十善明已所以取羅峰之意涇野得書報曰偶妄發言知罪過矣公偕九卿祭羅峰公又自祭羅峰蓋羅峰欲釐當時弊政復祖宗成法志與公合第議論不無異同世人疑其不相能故公暴羅峰心跡復自述焉

二十三日 駕還京

四月朔一日戊戌

七日饒孫學士神樂觀

十三日庚戌進 賀東宮表

十五日 駕入京十七日彗星見於星宿

二十日丁巳上問安疏

二十三日庚申接巡狩詔

二十五日壬戌接冊 東宮賚幣

五月朔一日戊辰出上河餞周虞承 名世雍 憲副

七日攝祭誠意伯夫人

十二日上慶賀疏

十九日攝祭誠意伯夫人

二十四日齋宿夏至

二十九日吏部咨至轉北禮部尙書

先是夏言所舉官僚多非其人
有以賄進者御史洪垣論劾
上怒悉黜不用特委吏部推舉
太宰許松皇博訪得天下名士
九人而公為首許太宰薦公疏
云剛正不阿忠直有識志守
頽風允為官僚之選云

奉

旨霍韜加太子少保禮部尚書掌詹事府事便行取來

鄒守益徐階等七人並授春坊等官獨黜薛蕙不用

是月少師夏言免

時上幸大峪山內閣進居守勅遲緩上大怒手勅責夏言曰言自微官朕命張孚敬令贊郊禮之議遂不次進官其所倚任皆朝廷恩眷自當益勵公勤盡忠事主乃每每怠惰不恭昨所選擬官僚多不稱用密疏既不遵式却借封皮行私原賜印記歷年御帖可即繳進尋降少保着致仕數日托內官高忠巧

為祈哀遂復少傅還閣辦事未幾高忠代夏進玉器祝壽上以為疑二十一年上廉知其交結高忠泄禁中語大怒因霖雨傷稼列其罪狀示都察院復奪職閒住

六月朔一日丁酉辭部事

五日謁陵

二十一日候章聖皇太后梓宮駐江浦縣謁莊定

山祠

湛甘泉作莊定山墓誌謂定山晚年畏邱文莊不得已而出公為文祭定山辨其不然謂定山再出瓊臺已物故云

二十七日送章聖皇太后梓宮于大勝驛

是時總督扈從太監鮑忠駙馬京山侯崔元等所過地方受饋遺患巡按直隸御史黃正色劾之忠遂論

正色於梓宮舟前執扇騎行涉險並不隨舟料理
 上大怒命錦衣衛逮正色下獄訊治眾咸謂事干巨
 璫正色必死比逮至適公北轉乃語掌詔獄官曰
 皇太后梓宮南下護從官員大恣貪暴天下切齒獨
 一御史糾正即抵罪戾今訊治削籍從戎皆可也若
 擬死擬廷杖或獄中有故子則決為直之對曰吾輩
 亦有人心安可負國獄中保無他第恐貴勢主持罪
 難輕擬耳公復揚言於朝正色得請戍遼左

七月朔一日丙寅寓見古書院

公在見古書院嘗與門人何世守輩論陸氏之學曰
 楊簡非聖逃儒拔儒附佛人尚或知其非陸氏先立
 大者之說似是而非知之者鮮矣予辨之也惡似而
 非者也不得已也諸子問曰孟子謂先立其大者陸
 子亦謂先立其大者乃咎陸背戾何也曰孟子先立
 其大者謂心之官則思以思為官凡耳目之官皆稟
 命焉大先立而小不能奪能思故也陸子則顯把捉
 其心無復致思此心之官先失職矣何大者先立之
 有其強辨浮詞冥然悍然無所
 顧忌正告子力制其心之緒也

論韓退之原道云韓子原道一篇最純粹無可議者
 後儒譏誚過甚於博愛之謂仁或謂其流於兼愛然
 下文不曰行而宜之之謂義耶或又謂其以愛為仁
 指情作性夫未發一理渾然已發仁義乃見故孔子
 謂愛人為仁孟子即惻隱觀仁周子曰德愛曰仁何
 獨於韓文公而議之况韓文下又曰足於已而無待
 於外之謂德耶原道又曰古之欲明明德於天下者
 先治其國欲治其國者先齊其家欲齊其家者先修
 其身欲修其身者先正其心欲正其心者先誠其意
 然則古之所謂正心誠意者將以有為也今也欲治
 其心而外天下國家滅其天常云此言體用一原顯
 微無間所以闢佛氏者廓如也程朱謂其所見尤高
 說得端的者以此
 惜不明言其旨
 論韓退之原性云韓子原性自佳孔子曰生而知之
 者上也學而知之者次也困而學之又其次也三品
 之說何妨後儒乃嫌其太拘謂若此有幾十等又謂
 三品只說得氣不會說性彼以仁義禮智信為性何
 等的確三品者人之性其性不
 同也氣有純駁故理有偏全

論管仲云齊襄既沒小白子糾皆羣公子未有君臣之分委質爲臣斯爲之君矣子糾實管仲之君也管仲不死子糾之難反臣小白狗彘之類也若王珪魏徵特東宮官屬唐室公臣當建成之難王魏在列身殉死之可也時不與難高祖以二臣輔導無狀賜之死可也高祖許之勿死亦可也其於管仲全不相似後之君子乃深罪王魏而孔子特許管仲爲仁何也此孔子不輕於與權之精意蓋天下大義有父子之分焉有君臣之倫焉有中國夷狄之等焉義在君臣則忘父子義重夷夏則略君臣此孔子春秋稱量之權也荆楚橫暴周室衰微岌岌乎有混宇宙爲夷狄之患偶有才如管仲輔相桓公攘荆蠻以尊中國脫天下被髮左衽之禍其救世之仁大矣故孔子畧其臣節之失許其仁人之功乃稱量之權衡萬世之人極也

六日辛未進聖功圖

疏與鄒郎中守益聯名王尙書崇慶見之嘆曰萬世瞻仰在此疏矣

十九日上災異自陳疏奉

旨卿方承簡任宜到任供職不允辭吏部知道

是月莫方瀛乞降

洪武初漢陽知府易濟頌詔安南國王陳日烓遣使朝貢上嘉之封日烓安南國王其後爲黎季犛所篡永樂中遣張輔征安南凡四次皆平之置郡縣者三十餘年宣德三年黎利反詭稱陳氏後朝議遂棄交趾嘉靖六年交趾逆臣莫登庸篡黎氏僭帝號改元明德九年登庸用謀臣計禪位于其子方瀛自稱太上皇方瀛擅作大誥屢乞貢不許黎寧遣人航海至京請討之時夏言當國受方瀛賄擬聽其降公聞之嘆曰登庸篡逆十餘年得保首領幸矣子孫必不能保不待智者而後知也乃亟與之詔書頒之正朔俾定爲位何爲者也比尙書毛伯溫借咸寧侯仇鸞奉命南行公語之日若問順逆則黎爲順莫爲逆三尺童子可辨若問莫肯投降否彼則肯降又問肯貢否彼則稽首歸貢遣三尺童持片紙彼則順應如響

不煩二公行而後定也何也莫自篡竊後恒懼國人之討是以正朔急於乞頌也然莫黎胥願貢則二公何以處之毛不答蓋將推事任於撫臣耳雲南巡撫汪文盛整旅待命或以爲訝汪聞於公公爲書報之次年公薨後一月登庸降於鎮南關毛尙書伯溫蔡侍郎經以聞登庸姪莫文明齋降表至京稱黎寧乃阮淦之子黎已無後當國者獲重賂力爲之請遂詔收安南國王印以登庸爲安南都統使登庸仍僭帝號於其國使公而在當鎮南關之請必有善後之策矣公嘗謂應乾日夏桂洲犯三大僂多進宦官一也密進宦官二也受夷賂佑篡逆三也有此三罪桂洲其能免乎

閏七月朔丙申寓見古書院

公輯詩經傳註傳多從小序註多從朱子如關雎云后妃之德也后妃以不妒忌爲賢以廣宗嗣爲孝以進賢淑爲大關雎述后妃之心也序曰樂得淑女以配君子憂在進賢不淫其色哀窈窕思賢才而無傷善之心焉深得詩旨舊說以爲文王未得后妃文王思而求之非邪思耶若曰官人思而求之也文王未

有后妃先有官人耶惟以后妃思淑女共事君子乃見聖德其詩則詩人所作下文樛木螽斯皆所以答關雎也湛甘泉甚信小序乃於此篇獨指淑女爲后妃而刪去憂在進賢數句意索然矣葛覃亦詩人所作朱子以無贊美爲后妃自述不知此正所以深美之不言勤儉孝敬而美溢言外古人美刺皆如此

汝墳序在周南之未麟趾之前商之所以終周之所以始也何彼穠矣序在召南之未騶虞之前周之所以終列國之所以始也平王卽周平王也齊侯卽襄公諸兒也周室東遷王迹息矣王姬之賢猶如此可以驗后妃風化之遠文王修齊之效之澤之深且長也是序詩之旨也

輯詩傳至秦風無衣章王于出征與子同袍日周民共戴王室之心歷世不忘如此猶宋南渡宗澤奮臂一呼河洛遺民從者百萬也惜也周天子不能順用民心舉王業輸之秦焉秦欲勿強得乎詩可以觀聖人垂訓精意也

詩經凡言時月皆夏時也三代所同也春秋春王正月夏時夏月也幽風七月夏七月也十月之終卽云

日爲改歲蓋周以十一月爲正朔雖改十一月爲歲首未嘗改十一月爲正朔也

二十二日 聖功圖奉

旨所進圖冊中間語多回隱意實假借誇訕非人臣禮
禮部看了從實叅來

時土木連年不息公於聖功圖陰寓規諷之意畫神堯茅茨土階畫大禹卑宮惡服圖說中言古帝王宮室服器多從儉素及稱漢文露臺惜百金費畫西苑耕稼圖說中引聶夷中詩云我願君王心化作光明燭不照綺羅筵偏照逃亡屋上覽之怒故加詰責

二十七日叅報至奉

旨姑念納忠免究冊疏不行

八月朔一日乙丑寓見古書院

黃省曾名士也時謁公見古書院公留款數日辭別日何以教我公日子學已成予何能有益于子抑聞之學以洞見大源爲要而戒于小道之溺譬之萬井之邑邑之衢徑萬其莽也有蟻焉由徑循衢日吾將徧涉終歲不能尋尺有鶴焉振翮而過萬井瞭然學亦如是而已省曾出語人曰極高明之學也江都葛澗卞峽來問學公曰爾從甘泉先生游卽隨處體認天理足矣學病多言日願得公修齊之矩以淑後生公乃出家訓十四篇及集古人嘉言懿行爲續編授之復請日願得公治平之矩以詔後生公乃出前後奏議攔國家大體者示之因輯爲疏要傳焉

三日丁卯謁文廟

四日偕湛甘泉鄧賁齋游新泉下館至于三山

公至南都遣兒姪從湛甘泉于新泉書院習二業合一之學居處執事期於恭敬朔望先跪乃揖每日禮者維持心術涵養德性操煉精神之要樞也與呂涇野相儻亦遣兒姪時造侍教日此教人學做聖人先

生也呂逵巡謝不敢當又曰湛先生學術中正無弊然門下太濫將爲累間以爲言甘泉日來者不拒未幾御史游居敬果有言

六日借湛甘泉鄧賁齋洗少汾名桂奇主事何石川名彥給事

游靈谷

十日賀萬壽節於禮部辭孝陵借費名歐陽名

兩侍郎

十一日乙亥啟行九卿餞于靈應觀鄉宦餞于船廠

舟宿鮮漁港口

公以五月陞職奉旨便行取來中間雖換上聖功圖覆報然遲遲至八月乃北上于中丞湛書來促日急君命也公有書答之載集中

十二日珪璉南歸移宿龍江關

十三日卯啟行西儀真會王葉谷都憲十四日酉廣

陵丑鳳凰橋遇宦逆

公江上夜行省儀從滅夫馬至鳳凰橋遇內官張禧聲勢赫然侵凌舟人舟人具告之禧從者日尚書豈如是耶詐也競趨過船見公乃謝罪公因查禧例合用一船加取快馬船八隻所至府州縣除拽船人役外仍勒取折夫銀八兩一驛費銀多至三十餘兩遂移咨南京兵部刑部及各巡撫查實拘提張禧家人及作弊夫甲轉都察院追贓治罪次年上民困疏復論其事乞勅南京兵部都察院嚴加究治

十五日卯邵伯申高郵丑界首

十六日巳寶應西淮安

十七日何承大別名世守員外西淮河間

十八日卯清口驛會孫性甫憲副名存西三議鎮巡司

十九日三議鎮上十里

二十日寅桃源會洪峻之御史名垣戊崔鎮巡司二十

日丑古城未宿遷鍾吾二十二日寅直河西邳州

二十三日卯新安遞運所午新安驛西栲栳灣二十

四日卯房村呂梁西彭城徐州二十五日酉夾溝二

十六日申沛縣泗亭二十七日寅沙河西南陽關

二十八日辰魯橋戍南城郭都憲燕名持平二十九日

戌分水北關三十日辰開河西安山

九月朔一日乙未未荆門戌七級上關二日巳聊城崇

武亥青陽三日巳清源駐四日戌渡口亥武城五日

寅甲馬營申梁家庄亥德州六日申良店亥連窩

七日辰新橋會聚議徐樾下十里風阻戌會王南渠

八日丑磚河辰滄州未乾寧樂濟尹來見酉青縣主

簿王世功來見

九日丑流河巳奉新造鄭浩然宅會姜叅政儀酉楊

青亥天津

十日桃花口上會朱僉事道瀾駐

十一日巳楊村西磚廠上謝疏

十二日河西務會何其高駐十三日酉白伏圈未至

和合四里

十四日卯和合上考察自陳疏奉

旨卿宮詹近臣朕所簡任宜即趨召供職不允辭吏部知道

十五日張家灣駐二十一日入京

二十三日朝 見

二十五日奉 旨泄任

上素嚴憚公比公至傳 旨某日出朝某日御經筵至期以疾輟免然而中外肅然矣太宰許松臯曰予在吏部每苦權貴囑托自渭老北轉宮僚權貴歛戢絕無請托者比公沒後松臯嘆曰渭老若在于尚能行其志今無望矣

二十六日謝 恩御門

二十七日從 駕駐 長陵

二十九日陪祀 長陵三十日回京

時九廟七陵營建大工皆翊國公郭勛董之先後奏支戶部錢糧無算梁尚書材曰予先任在部老庫尚有銀一百三十萬今來惟存二十三萬執不與郭奏梁阻悞大工罷去比郭訪公私第公正色責之曰梁儉庵為國忠謀公何為擊去大工浪費誰不知公所為乎郭拂衣去次日郭遣官校來謝公復責之日為大臣當為國家扶植善類愛惜財用不然是負恩寵也江彬朱寧何曾謀反不過恃寵恣肆擅作威福文臣蓄怒故以此加之耳今無故排去重臣此豈自全計耶郭聞言復遣人謝公薨次年夏少師言修怨遂令給事中高時劾郭代張延齡管家店下獄郭對刑部主事盧夢陽嘆曰悔不聽渭厓公言竟死獄中

十月朔一日乙丑

二十日齋居府

十一月朔一日甲午

二日陪 南郊祀

十二月朔一日甲子大禘于 太廟捧 睿宗皇帝主

十九日壬午陪 太廟祀

二十二日乙酉上禁訛言疏

是時上將復南巡郡邑科歛以待萬姓洵公乃請禁訛言因論前次南巡百官受賂之弊生民困苦之狀

奉

旨這訛言生擾都察院便查訪有無來說昨朕南巡卿

不在行這一起文臣受賄事情得自何人着逐一據

實指名奏來處治

二十五日戊子上究賄疏奉

旨查各官受賄事情併各處出銀實跡開具奏聞

二十八日辛卯上究賄疏奉

旨該衙門知道

上覽公前後三疏知百官索饋受賄之害雖不深究而南巡之議遂寢矣

三十日謝賜宴鈔

十九年庚子

是年公五十四歲

春正月朔一日甲午上元正慶疏

五日戊戌滿二品考

六日上民困疏

九日元極殿陪祀

十日癸卯捧冊嬪寶充副使

二十日癸丑奉旨復職賜銀三十兩

二十二日乙卯女信殤

二十七日薛瑄從祀議

公平昔論學以明倫用世為本與當時專講心學者異因上從祀議并論宋儒司馬光陸九淵諸人

二月朔一日甲子

四日文廟祭

五日社稷祭

十三日先農祭

十九日歷代帝王祭

三月朔一日癸巳

十日壬寅給誥命

公進階資政大夫公大父南谷公父西庄公並贈官如公階大母徐氏母梁氏前室區氏繼室鄭氏並贈夫人

十三日乙巳大風霾文德坊西長安坊壞西長安中

門關木折銅鈕出

二十一日陪祀太廟

二十六日移東宅

公自南入北僦居王晉溪故第晉溪子朝立不受值
公居其西宅至是移東宅開西宅為講堂延黃顯黃
宏字莫如善如爵如士十
餘人與諸子講習其中

四月朔一日壬戌

六日餞東郭鄒學士

名守益

有序載集中

五月朔一日壬辰贈楊夔州詩

五日齋居 方澤祀服總

十一日壬寅璞瑕歸嶺南

六月朔一日辛酉

十一日太白經天

三月風壞文德坊公深不怡至
是太白經天特紀之遂為絕筆

續石頭錄後編

霍文敏公次子與瑕手輯

從孫尙守添註

嘉靖十九年庚子八月朔一日庚申

十日己巳奉

聖諭朕仰承

天恩下眷嗣統臨朝已旬多歲矣自十三年來至今早朝
盡廢政多失理以致災變屢生財用匱乏民不安生
者雖睡在宮中此心如履深淵一般言官沒一箇奏
聲待他說時即可借爲他每防禍把滑不言我今却
不得不自言早朝不修祀典多遣代與尸位同朕近

血氣衰初髮鬚脫半精神太減大不如舊雖即無他
事亦恐未可不慮也東宮雖幼上有赫赫昭鑒保定
必矣或權命監國重大仍奏請朕少解一二年調養
或可親政悉若初不敢又取逸耳亦非作術以弄巧
成拙只得清澄思慮靜養靈臺但得氣血還昔諸疾
盡去即復初勤豈終肯怠了卿等以五六人不肯擔
當禮官就把這諭播廷臣限三日議上不許藏欺出
詐君固瞞了如鬼神可欺乎朕非陷今日之仙術酷
元元之是尙此身之苦怎麼自家誤自家云

十二日壬申上欽奉

聖諭議

東宮監國疏

疏入留中各官疏俱不下次日召九卿百官至午門
獨杖太僕卿楊最死焉最疏力諫求神仙事故也遂
寢監國之議

二十七日丙戌公子與瑕中式鄉試第九名

公子與璞與瑕並中選洪侍御垣恐忤夏少師錄瑕
棄璞邑人霍超亦中選洪疑公族人併黜之公四子
與珙隨任就試順天亦中高選考官
左庶子童承敘以夏故黜不敢錄

九月朔一日己丑上災異自陳疏奉

旨卿學識老成朕所簡用宜照舊用心供職不允辭吏

部知道

謹按公自登第隱居山中八年始就主事復乞歸山
後蒙 召用固辭四載乃赴兩辭侍郎五辭尚書及
前後告養病致仕無慮數十疏此其進禮退義足以
廉頑立懦與貪權戀寵屢斥屢營起用與內侍術士

寅緣依附卒以僂辱者天淵矣世之論者有曰霍夏
二公皆一世高才當時乃不相下嗟夫薰蕕豈同器
哉

是月公病

自杖殺楊太僕後公鬱鬱不樂有
次張甬川東閣書懷詩亡何病作

十月朔一日己未病劇

四日壬戌作遺囑家書

七日乙丑申刻公薨

公子璞瑕北上未至公病篤嘆曰死定數耳恨不得
口授二子以千年絕學遂薨同鄉士夫知公清介議
斂銀爲喪計公子珉珙等
辭之日幸有俸金乃止

史臣贊公曰質直好古行誼高潔立朝敢言無所顧

忌葢實錄也

鄒侍郎守愚嘗曰涓厓公峻節孤風雄視百代志在

激頑振懦海內學士大夫聞其名者慕與畏并

崔侍郎銑曰涓老掌留都秩宗清娼籍毀淫祠配僧

尼禁和買革浮費定喪葬興社學祠忠義明禮制教

雅歌一時士風翕然丕變可謂真宗伯矣

郭處士肇乾曰涓厓先生在山中最潛心於
祖宗

法度恒云湯惟纘禹舊服武惟政由商舊孔子惟憲

章文武今之庸人每以聰明亂舊政迂儒每以古道

非當世皆孔子之棄也故公於國家定保之謨生民

休息之故興衰舉墜之術撥亂反政之規每倦倦焉
自南轉北台衡在望使天假之年蒼生受賜豈淺淺
哉

魏莊渠與林勿欺書云兀厓之亡於世道大有關係
南京一小內臣大叫曰朝廷崩一座山矣里人有在
山東作縣回者曰昔傳駕又將出官民俱不知死所
卒賴兀厓回天則兀厓非但忠臣乃直隸山東河南
之再生父母也

二十七日璞瑕至自嶺南

黃尚書綰慰疏云不意尊公忽爾謝世上爲 朝廷

痛無此骨鯁貞誠之臣下爲士林痛無此廉介直諒
之友區區鄙心可盡與世人道哉

鄒祭酒守益慰疏云驚聞尊翁奄爾薨逝悲悼殊深
追憶夙愛曷勝悵惘嗚呼撐持宇宙整頓人極公之
所以委重於予而戒懼中和中和位育予之所以期
待於公今則已矣續公之志以炳家聲而宣暢吾道
者非昆玉是望哉

程尚書文德慰疏云忽聞尊公之變驚悼太息莫知
所云時方對親朋輒黯然罷會然猶幸其不真以自
解也久之則聞已有報矣於是舉家齋咨旣而通邑

齋咨以此觀天下當亦同夫一家一邑矣朝廷之柱石縉紳之範模而今誰賴哉良可痛悼門生館閣之私姑未暇悉陳也抵沛阻淺不獲候奠此生倘復得之嶺南卽當匍匐墓前一哭卒此挂劍餘悲云

十一月朔一日戊子禮部題請合應給與全葬并祭四壇差官護柩還鄉等因奉

聖旨霍韜准照例給與葬祭與他諡

吏部題請贈官奉

聖旨霍韜贈榮祿大夫太子太保

翰林院題請諡奉

聖旨霍韜諡文敏

六日癸巳侍讀黃佐等祭

預者給事陳邦脩御史曾守約車邦佑李蘖郎中何繼之吳會期陳大綸陳大威員外何中行饒相主事張烜李憲陳珪馬拯盛若林周世昭鄭廷鵠陳天然舍人立京博士馮教助教蕭躍龍寺丞吳世寶通判黎瞻進士陳紹儒錦衣千戶陶鳳儀百戶鄭道

十二月朔戊午

二十四日同年戶部侍郎張漢等祭

預者戶部侍郎王杲禮部侍郎陳經工部侍郎鄭紳

府尹戴金布政使沈教按察使任維賢叅政孫膺副使劉佐行太僕卿劉機

二十五日壬午舊屬吏吏部郎中林春等祭

預者郎中王嘉賓張忠高耀司務胡東魯羅淮員外郎王與齡周卿劉塾鄭曉主事胡鯨許穀吳伯亨李愷錢邦彥張烜

二十年辛丑正月朔一日戊子

二月朔一日戊午

二十五日壬午

皇上遣禮部右侍郎馬汝驥 諭祭日卿賦性剛方問學

該博蚤魁春榜列職夏官抗疏輸忠贊成大禮超遷詹事史館效勞佐政詮曹正位南禮頃因北轉職任官僚委用方殷胡遽長逝訃音來上傷悼曷任爰命所司并賜葬祭卿靈不昧尙克欽承

賜祭儀注

禮部題准行翰林院撰文光祿寺官備祭品錦衣衛官備辦儀仗傘蓋儀從太常寺官備鼓樂鴻臚寺官備

龍亭香案亭先二日預知喪家設靈位於廳堂坐西向東至日教坊司備鼓樂前導次儀仗傘蓋一如

皇上親臨之儀次

龍亭香案祭文亭次太常寺官二員次鴻臚寺官四員次
光祿寺官二員次祭品次遣祭官至喪家安

龍亭於中堂坐北向南鴻臚寺官引遣祭官至靈前孝子
跪於靈右向北舉哀叩頭贊禮官唱上香執事者以
香帛遞上唱獻酒執事者以酒酌上唱宣祭文贊禮
官宣讀祭文畢唱再獻三獻唱焚帛贊禮官引遣祭
官及執事官於別室次早孝子赴鴻臚寺報名謝

恩行叩頭禮

祭品

豬壹口 羊壹口 五食 五醢 五果 五湯

看牲五盤 豬 鷄 鵝 牛 魚

看果五盤 各叁拾觔

海青壹座 酒壹罇 俱用桌子擺列用黃袱遮蓋

扛擡鼓樂前導祭葬

三月朔一日丁亥

皇上遣行人司行人游震得護喪南歸

七日癸巳少師大學士夏言少保大學士翟鑾等祭
預者少保尙書嚴嵩尙書溫仁和侍郎兼學士張邦
奇張潮孫承恩副都御史胡守中詹事兼學士陸深

太常寺卿崔桐學士張袞張治庶子兼侍讀童承敘
諭德兼侍讀龔用卿屠應峻侍講胡經侍讀黃佐中
允兼修撰李學詩秦鳴夏閔如霖贊善兼修撰浦應
麒修撰周文燭茅瓚贊善兼檢討郭希顏閻樸司業
王同祖司直兼檢討呂懷謝少南編修敖銑駱文盛
尹臺郭朴王立道康太和歐陽暉稽世臣檢討黃廷
用郭盤陳東光全元立張緒通家子司丞張遜業舍
人桂輻顧亨都事王朝立典簿李文察並自舉祭
八日甲午觀政進士何孟倫等祭

預者進士陳善林冕舉人劉模彭漢羅一中何譽趙
鶴隨蘇子汲陳捷張叔庠周鵬周都邵龐蒿王漸造
梁士介蕭廷相許炯陳棐陳恪潘庭楠劉漢龐一玘
同日門人侍講胡經等祭

預者少卿李開先高擢寺丞曾銑孫應奎司丞汪宗
元修撰羅洪先唐順之給事中黃光昇邢如默章允
賢御史曾守約常時平黃綬楊爵伊敏生金清周汝
員賈準郎中王與齡詹文光葛守禮熊過張忠劉瑜
唐時英陳子文陳大綸王學益楊博黃訓黃福朱麟
徐泮周如砥楊本仁員外劉曷劉塾夏浚冠陽魏煥
薛甲張文鳳主事張烜林性之陳捷張鎬陳珪張鵬

翼江滿榮愷經歷林璧知府程尙寧

九日乙未門人觀政進士黃顯等祭

預者進士莫如爵莫如善莫如士黃宏宇生員楊紹

元盛之果

十日丙申發引于京九卿送于順城門吏部侍郎張

邦奇獨送至海岱門是日

皇上遣工部員外郎顏德倫往廣造墳

四月朔一日壬戌

二十八日副都御史郭持平祭

五月朔一日壬辰

二十五日僉都御史陳察祭

二十八日右都御史王大用祭

六月朔一日辛酉浙江巡按御史王紳唐臣祭

六日丙寅舟經蘭谿禮部郎中周文光越三百里來

祭

二十二日壬午 高皇六世孫古洪瑞護國將軍堅

白遣內使致祭

七月朔一日辛卯

二十日庚戌行人游震德奉 命護喪抵家

八月朔一日庚申行人游震德祭告回京復 命

三日少保大學士方獻夫祭

同日兵部尚書湛若水祭

同日兵部侍郎黃衷等祭

預者府尹陳錫僉都御史李義壯副使鄧炳僉事梁

世驃給事中蘇應旻御史黎貫郎中畢廷拱鄭翹徐

進趙宗信主事何俊知府林時衷梁建辰自舉祭者

通叅倫以諒祭酒倫以訓僉事曾昌主事洗桂奇知

府鄧文憲趙善鳴

十二日辛未

皇上遣廣東布政司左布政使楊詮 諭祭曰卿海內聞

儒中朝耆彥衣冠屬望胡不永年追念往勞載申卹

典茲當末七諭祭用頒九原如存承我休命

禮部行本省

九月朔一日己丑

二日庚寅

皇上遣廣東布政司左布政使楊詮 諭祭曰卿海內聞

儒中朝耆彥衣冠屬望胡不永年追念往勞載申卹

典茲當百日諭祭用頒九原如存承我休命

十月朔一日己未

十一月朔一日戊子

二十日巡按御史姚虞祭

十二月朔一日戊午

五日提督兩廣侍郎蔡經祭

浙江江西福建山東山西兩廣等處布政司布政使
詹瀚等先後致祭百有十二人

浙江布政使詹瀚歐陽必進叅政盧蕙婁志德馬紀
叅議柴儒按察使任維賢副使蕭一中張鏊鄒堯臣
王汝孝僉事劉望之艾希淳方孟縉江西叅議岑萬
副使周世雍福建布政使梁廷振山東副使張意山
西叅政王儀廣東布政使楊詮田秋叅政張岳蕭晚
周擇叅議宋茂熙按察司副使韓楷周延林雲同陳

茂義僉事雍瀾趙維劉廷範商大節林希元廣西布
政使吳章僉事馮徽總兵湯慶程鑒都指揮王玉韓
平張典邢世傑李奎楊忻李能英管闡主事沈良鄭
汝舟兩浙運使洪富副使沈子明知府張志選王學
禮陳仕賢楊成謝存儒王養正祝詠林介符錫胡鳳
同知林鳴鸞何士鰲陶廉張孟澄裴相程鐸通判陳
嘉猷辛紹佐薰樞王宗尹桑秦潘嗣朱延文周鼎虞
价劉彰晏杞廖長倫張日蒙何偉周璞李冕推官金
志陳一德陸愚黃約吳道南高尙義盛唐趙承謙曾
樂方舟鄭錫麟劉起宗知府陳克昌曾夢祺知縣黃

日敬袁袞蕭善登陳富胡德純喻時吳世良張道孫
私軾程世鵬蕭軾張遂龔鐸王春服湯紹夔吳寵王
洵吳宗湯

二十一年壬寅正月朔一日丁亥

九日乙未

皇上遣廣東布政使司左叅議宋茂熙 諭祭日卿海內
聞儒中朝耆彥衣冠屬望胡不永年追念往勞載申
卹典茲當窳窳諭祭用頒九原如存承我休命
司府縣祭

叅政張岳何相周釋叅議宋茂熙徐九臯按察使侯

緘副使周延林雲同陳茂義游居敬僉事雍瀾趙維
劉廷範商大節楊逢春翁溥等知府胡鳳同知程鐸
通判周璞李冕馬子文推官駱居敬南海知縣張峰
增城知縣舒文舉等並先期致祭

禮部尙書兼翰林學士黃綰祭

湖廣按察司僉事劉汝楠祭

是日初九乙未工部員外郎顏德倫布政司左叅議
徐九臯奉

上諭葬公子增城南鄉嶺丙午向之原

東至牛行路界

西至石礫水界

南至田界

北至分水嶺界居民有侵越竊盜者問擬如律

造墳官

欽差工部營繕清吏司員外郎顏德倫

欽差廣東布政司叅議徐九臯

廣州府通判李冕

南海增城二縣典史陳佐邱玠

烏石茅田巡檢王欽李龍

嘉靖二十一年四月廣州府立石

當時會葬者二千餘人

華蓋殿大學士夏言等祭日維 公筮仕 中朝奮

自南服通籍儒林海邦世族禮闈舉首歷任兵曹耿
介自信超邁人豪遭值 聖明贊議大禮爰契 皇

衷名位日起登崇翰苑遂履宮端論思侍從晉貳天
宮擢守留都俾掌邦禮夙夜寅清力振頽靡 召還

京闕翊輔儲宮爰稽訓典圖上 聖功望崇中外位
司喉舌簡在 九重倚任方切云何一疾倏爾長征

殃生二豎忽墮台星蕩蕩 帝恩諡以文敏生榮死
哀千古不泯薄陳一奠聊寫哀悰洋洋英爽肅颯其

風尚 饗

南京兵部尙書湛若水祭曰嗚呼公平嗚乎傷乎嗚呼公以其經天緯地之文離倫而絕跡望之而不可卽乎公曷以其驚天動地之才卷藏於閨寂乎公抱負其掀天揭地之志以卒今將永歸于窀穸矣乎嗚呼傷乎嗚呼公平其忽焉亡之矣乎吾誰與歸乎寧不我戚乎雖然公旣云達矣知命而不終死生壹理矣陰陽異道而大同矧公之宅陰于眉山之南我之書室近在眉山之東幽明不遐有感而通混然相尋於宇宙之無窮夫何有乎涕之無從哉尙 饗

大學士方獻夫祭曰嗚呼天有正氣人鮮得之或汨

于欲存者幾希惟 公獨稟如嶽之峙在流不波在風不靡大禮之議公實先倡正名父子追復興常帝禪王繼其道皆同千載之下以開羣蒙 天子明明擢之不次屢辭不受以見其志諤諤立 朝眾枉交疾賴 聖之知不至折屈漢有汲黯唐有魏徵淮南謀寢貞觀治成子嘗比之公亦自信惟能皦皦詎肯溷溷嗚呼惟公清直邦家之楨豈期遽殞孰力以承子實何慟 社稷生民言之嗌哽醉以斯文哀哉尙 饗

侍讀黃佐等祭曰嗚呼天地中正衷降惟均克濟陽

剛世能幾人惟公秉德奮跡南海石頭之鄉見此磊
磊大魁春省家食七年結廬樵嶺嘯傲雲烟養晦俟
清 聖作乃起筮仕職方抗言大禮 天子曰俞繼
統則然繼嗣則否嘉爾能言國是未定病告歸隱禮
出既成孚協惟允 天子曰都爾副宮詹部檄促之
離隱出潛乃進宮端鑾坡之長親蠶郊祀執持岫強
天子曰拂爾每子違械而釋之寵眷弗衰懼艱服闋
誓貳天官黜陟惟公詣銓者權 天子曰吁爾勤爾
忠乃遷留都以掌秩宗向成大典六辭茲命舍北而
南惟公恬靜乃申禮制斥去奇衰澤及尼娼使有厥

家前後建明逾四十疏斷斷懇切遠邇傳播乃晉宮
保以輔 皇儲進言留駕天下晏如志所猷爲實不
止此天不憖遺今也則已其所獨見周禮繫辭斥以
爲僞卓然不移象山之學指爲禪利儕諸莽操確然
不拔詩傳漢書乃芟乃裁改紀惟力毅然不同心之
所躋尊崇猶天其所不躋淪之于淵如彼稼穡蔗菘
惟力忽爾翹翹阪田之特如彼涉川洶湧波濤緋纒
弗動蘭漿自操填胸正氣彪炳森列上爲列星耿耿
不滅聖情倚注倚公克終邦之殄瘁云誰不慟儉以
訓家勤以訓子有子克家駢駢卓起亦既卓起高舉

于鄉傳公之芳公也不亡牲醴匪馨惟誠斯格惟公
精靈顧我悱惻

觀政進士何孟倫等祭曰嗚呼梁木其摧泰山其圯
愴怛有懷將安仰止惟公之生獨完正氣方其浩然
掀塞天地夙擅魁於南省遂奮揚於筮仕正堂察敘
謁之私致闔閭聞風之避方達行之足兆載歛德以
懷歸際 龍飛于嘉靖適濮議之牽携明繼統繼嗣
之義定盡倫盡制之規誓邁軸於樵山幡籲聘而中
改翰苑司宗宮端晉逮聯四輔之寵光肆三劄之竑
劄言必剖乎幾先見每周乎事外疵周禮之匪彝祈

親蠶於大內就徽纆而訂詩雖百折而慷慨已迺精
忠上揆俾貳銓衡爰災眚以飾躬勞任怨而茹憎貪
墨距脫而遠逝俊又茅拔以同登未幾柄禮南都品
秩上下 帝闈遠而必言名分尊而不假佻優率良
腥鱗滌洒載隆北秩翼德青宮蒙期養正圖上聖功
樹國本於彌固錫民福於無窮思效蹇蹇匪躬之力
莫旣區區欲罄之忠蓋公之講學存乎立極達才裕
乎經濟體治蜀之尙嚴慕焚香之告帝叔子重道而
日講避榮司馬建言而樞密辭貴隱虎豹在山之雄
決推陷廓清之勢故振激足立乎頑懦誠朴動格乎

幽明奔雷驅燼廟之石患虎息峽山之移方正志於
園土遽蒙日以風霾雖若人之容偽會謂天其可欺
嗚呼九原不作直道已而典刑如在百世攸師緬維
桑梓實涕其悲束芻載奠不腆陳詞哀以天下匪吾
人私耿光不磨俎豆其依

禮部郎中周文光祭曰嗚呼文魁天下不爲公奇學
貫古今不爲公異位極卿相不爲公貴名顯四夷不
爲公榮惟公負剛大之氣秉忠貞之節至誠足以御
物至公足以勝邪至廉足以立懦至毅足以任遠臨
大事決大疑排大難如其道也誘之以聲利而不動

非其道也怵之以禍患而不驚辨乎泰山之具瞻挺
乎中流之砥柱學者仰爲山斗百姓信如蒼龜君子
賴之而有所樹立小人畏之而不敢妄爲中外方慶
明良之會復覩太平之盛何天不憖遺奪吾元老之
速也豈斯民遭困而吾道當阨耶抑貞元未啓而將
有待耶或游氣雜擾而賢哲痿痺耶無亦方正難合
而蜂蕙肆毒耶彼蒼者天吾不得而知也嗚呼公之
身逝矣而公之神炯炯宇宙間如雷電鬼神不可測
識猶足以懼奸諛之心褫貪夫之膽不殛其身必誅
其子孫蓋歸然而獨存者豈與身而俱徂也耶不肖

平生之志不理於多口而獨蒙公之知尙冀在天之神不享於匪人而特鑒不肖之誠詎曰澗谿繁藻之榮敢羞於公乎

禮部尙書兼翰林學士黃綰祭曰嗚呼我公逸羣之才蓋世之氣超然直視沛然無畏當言必言雖權不諱典禮之章近倖之弊南巡之止監國之議漢庭汲黯洛陽賈誼獨立一朝奮乎百世胡天不憇遽爾長逝伊優滿堂誰啟公樽與言痛心莫揮悲涕

湖廣按察司僉事劉汝楠祭曰惟公奮起南服鬱爲時棟處也卧龍出則威鳳外雖磊落中實空洞道植人綱才經世用士曰休哉希文在宋公秉寅恭夙夜不遑抗疏論列達于 帝闈國是匡弼 王休對揚

口若河懸手抉天章士曰休哉曲江在唐公性忠鯁立朝侃侃冰蘖自將金石可貫正人所怙愾夫所憚古之遺直國之楨幹士曰休哉長孺在漢中庸不作大道以還智士刑方曲學逃禪光明俊偉在公卓然誰其方之名山大川末世滋僞彌文滅質物愛其情士神其術忠信誠慤惟公畫一誰其似之青天白日嗟嗟我公蹇蹇匪躬見義必爲如水必東 帝眷方欣簡弼春宮胡不憇遺以養聖功生榮死哀人心則

同

戶部左侍郎同年張漢等祭曰我國家重甲科我武皇甲戌之榜得人爲盛惟時新安唐公貴溪黃公淮陰蔡公實爲廷榜之魁涇厓霍公爲春官榜之魁識者已有慶雲之占矣旣而黃公唐公相繼不祿漢等方痛造物者奪吾榜之賢也歲庚子秋少微星若有抱珥觀象者謂將不利於大臣蔡公果不旬日而沒霍公又不旬日而沒嗚呼豈賢哲爲造化大忌耶若涇厓公者剛直之氣宏大之學康濟之才聖天子方倚任之俾究其用其所至固自有不可量者矣公昔議大禮明大倫當其詢謀弗同之時獨能卓然不懼訐謨益堅卒排眾疑用成聖天子顯親之孝公之才可知也今其已矣可嘆哉嗚呼何吾榜幸而多賢又何不幸而多賢淪亡之速也漢等所以長息不平重有感於公之歿也至於公之績紀太常名流士苑神遊八極固有長存而不死者何止爲同年之義哉尙饗

欽差提督兩廣軍務兼理巡撫兵部左侍郎兼都察院右副都御史蔡經祭曰嗚呼惟公海山靈氣斗宿精光志堅金石行尙嚴方超時議論振古文章名魁藝苑

聲重琳瑯明倫抗疏茂植綱常於昭 聖孝實賴贊
囊白茲承 眷荐陟巖廊蹇蹇諤諤百鍊之剛方期
端揆仰弼 垂裳遽云星隕孰揣彼蒼 皇情攸惻
卹典用昌有斐令子玉立鳳翔充迺餘蘊接武繩芳
締交旣久誼切惋傷緘詞束帛遙薦壹觴尙 饗
都察院右都御史王大用同工部主事鄭汝舟祭曰
嗚呼 公屋之背有厓如兀先塋其下曰啟袍笏蔭
注者誰虎鬚劍眉狷介剛直而豈可移發軔會元職
方簡畀乃借三輔爰贊 孝治翰苑少詹不次超遷
起貳冢宰鈞衡罔偏宗伯留都特擢 宮保蹇蹇匪

躬爲國元老止蹕回 天攝議貫日商室中興實賴
良弼善類氣吐奸諛骨寒臂之虎豹隱然在山大用
等性靡諧俗才乏經世受知殊深有懷零涕訃音忽
報疑信搖搖胡奪之速楚些曷招於惟完節公克終
始施而弗究貽謀翼子鑿江悠悠丹旒來游鑒此束
芻嗟彼中流嗚呼尙 饗

南京通政司右叅議倫以諒國子監祭酒倫以訓祭
曰惟先生崛起南服鵬騫鳳翥以萬言冠人下以三
劄贊 明主至論 大禮合 聖心正萬世之彝倫
裒然爲一代禮樂之盛舉荐登膺位遜辭偃僂疏數

十上中多補偏揀弊之切語使所司悉行其言則天下國家可坐而理晉登少宰公正廉諳聿典文衡才賢雲聚陟秩宗于留都宿蠹蕩然如去 帝念邦直載居保輔 國本是安 儲貳是比立 朝侃侃孤忠自許清廟希音頽波屹柱君子有所恃以冀征小人有所懼而自沮其尤卓偉者毅然壹疏默字 聖慮使天下曉然知 大駕之不復南遊良謂萬生靈帖然安堵眾方倚以有爲云胡壹疾而不起天喪哲人邦國若否我心則憂吾道已矣蓋非特以壹家姻婭之故而爲此無從之涕泗也先生之後賢胤是似

先生之名鍾鼎是紀惟先生有靈其尙無忘乎斯世
幽贊神明潛臻至治庶幾不負 聖明知遇之恩而
亦卒遂先生之素志嗚呼痛哉尙 饗

欽差巡按浙江監察御史唐臣祭曰嗚呼海內名德重望
正氣直道如 公者能幾人哉公年未躋於朝耄位
方荐乎台司天下之心屬望于 公者蓋未有涯
也而天不憖遺謂之何哉嗚呼蒼生失望後學失依
邦國之瘁而豈公之不幸哉茲者靈輻返葬道出于
浙臣也奉 命觀風于茲臨 總帳以跪奠觀江旌
而興悲生芻壹束爰寫我私尙 饗

巡按浙江監察御史王紳祭日惟公廉厲端執不爲
融通直諒坦洞不爲悅容蚤魁南宮而士欽其望位
高八座而慮周民窮進讜言以匡國是贊大禮而
悟宸聰有康濟生民之志有不振士氣之功有懇
然不奪之節有確乎不易之忠方簡注於宗伯乃
培養乎儲宮人共仰勲猷之懋著天胡俾耆俊之
遽凶生平偉抱卒未展於宥密而下方氓庶或持泣
於蒼穹嗚呼痛哉紳也誤簡錄於己丑遂濫預夫登
庸虞知己之莫副惟矢勵於寸衷驚悲訃之遄及傷
斯道之失宗方攬轡於浙上適丹旆之返東嘆王事
之靡盬愧執挽之無從敬祖薦於江滸徒揮涕於長

風尚饗

廣東布政司左叅政張岳等祭曰惟公松柏之操
金玉其姿皇圖楨幹朝野蔡著蚤年釋褐麟出
鳳儀職方發軔乃公輕車聖人讓禮公實贊之旋
登翰苑青宮是毗遷轉兩都爲吏爲夔鑑空衡平
矩絜規持蹇蹇諤諤有犯無欺與司政本職在衡璣
中外屬望匪公曷宜天也不弔胡不憇遺嗚呼文敏
有諡葬祭有彝振振公子以裘以箕天之祚公良亦
弗虧鳳凰之岡有屨有屨帝令赫赫藏公于茲諏

日發引 靈輿載脂式陳祖奠用寫哀私尙 饗

浙江布政司左布政使詹瀚等祭曰惟 公五嶺毓

秀百粵鍾奇剛中自有經綸自期大魁春省遂署兵

曹乘時抗議千古殊遭磨礪日勤 聖眷日篤朝野

同聲擬之孝肅 帝曰南都簡任實難于公借重宗

伯天官公承付託恒懼不效侃侃多章言圖領要

鶴禁森嚴方有所賴胡弗憇遺而公遐邁 九重振

悼百工含哀哲人何之魂招不來瀚等昔也聞訃傷

如之何今也迎柩有涕滂沱精白在心蘋藻在席靈

爽如存江濤如泣尙 饗

直隸常州府知府張志選等祭曰嗚呼天下方延頸

以望公之有爲也而公止于茲耶大夫士之負直氣

者方望公以有恃也而公遽止于茲耶天胡不憇遺

老成貞序糾虔以肅 朝廷以端士風以愜輿情耶

惟公蚤負才華大魁士林繼緣建議簡在 帝心薦

登卿輔知遇日深 公益感奮數陳古今秉道嫉邪

憂國奉公挺然獨立和而不同嘗竊評之公之敢言

有魏徵之風而節非徵匹也公之任事有寇準之力

而學非準及也公之文章賈誼之流公之氣節汲黯

之儔惜公未相爾使天假之年相公必矣相則才可

盡用而志可畢矣吾不知公之事業曷其極矣天下
有人所不敢言不敢爲之事公必待時而動于以驚
悚庸懦扶植綱常補天而浴日矣嗚呼天道無知英
雄有淚豈其齎恨而卒矣志逸等末學小生夙懷仰
止瞻弔靈車泣涕如雨嗚呼哀哉尙 饗

□□□□嚴時泰祭日惟 公蚤擢魏利躬逢

盛時敷歷清班崇階荐躋經世之才有猷有爲華國
之文維璧維奎靡書不讀何物不知此非其至乃公
緒餘所不可及有大於斯烈烈正氣巖巖英姿介中
有和公外無私枕度履衡襟矩帶規規清寒泚擬直

朱絲有犯無隱逆鱗屢批啟心沃心 聖學有禪大

事之斷公維堂谿大疑之決公維靈著蕭艾必薙芝
蘭必培主持 國是如山莫移釐正時弊如垢必除

慮周四方察及百司日皆吾分寧立町畦嗟嗟流俗
愈下其趨公爲砥柱屹然障之是故彝章丕著綱紀
弗隳壬人視魄善類揚眉 國有師表 朝有羽儀

苟微我公曷克臻茲公望維崇泰華維低公名維重
萬鈞維錙是故外夷動問海內懷思民望太平 帝
切倚毗僉期自此舟楫鹽梅使我公之少延獲大蘊
之究施則世可唐虞三代而公亦將皋夔稷契伊傅

周召之追矣奈之何二豎肆侮而竟與世永違也是故當宁震悼里巷涕洟山川失色草木凋腓羣鳥鳴號百獸踟躕雲愁風慘天日無輝豈非以大賢之存亡關時運之盛衰乎時泰愚懵且劣初學摘詞小人之文其別也狸何有於德爲文之基公謂可教進而弗磨反覆稱許仍有所期維公之襟滄海無涯細流必納寸善不遺肆如小子受知獨殊凡公所稱內省忸怩奉以勉旃後或庶幾嗚呼哀哀孝子扶櫬南歸我心孔切恨莫與俱爰沐芳華匍匐總帷跪陳詞而薦酒忽不禁涕淚之沾濡嗚呼昔蘇子之哭

歐公謂下爲己私而上爲天下今時泰哭公亦豈徒以猥辱知己而曾不知爲天下悲者歟尙饗福建布政司右叅政梁廷振祭日吁嗟先生胡爲乎遽止于斯耶若先生者所謂大丈夫非與鍾嶺南川岳之秀爲命世豪傑者乎自做秀才志已度越等夷矣及出而魁天下立朝著也以中心安仁自待以明倫大典自負以聖賢大道自任潤身有德傳家有訓致君有術華國有文弘毅剛大之氣若將吞河海而摧華嶽揭日月而塞兩閭兀兀乎砥柱中流而力障狂瀾之倒也覲得聞風貪廉懦立故曰

居天下之廣居立天下之正位行天下之大道富貴不能淫貧賤不能移威武不能屈若先生者其殆庶幾乎樂只君子萬壽無疆胡爲乎天奪之速而使我心傷悲耶天乎人乎吾不得而知也安能釋此恨耶嗚呼壽而不壽命之在天者也不壽之壽命之在我者也大丈夫在宇宙間不朽者固自有在豈以脩短爲存歿哉承芳濟美卓有賢嗣生榮死哀夫復何言振忝姻親素辱知愛乃各天壹方病不得省藥歛不得執衣悠悠蒼天恨曷其極痛切肝腸望風遡泣九原有知鑒茲悲梗尙饗

廣東布政司左叅議宋茂熙祭曰惟公嶺海英豪廟堂碩輔稽禮論政援據今古忠鯁天植世孰公儔漢則汲黯唐則韓休公若期頤朝野永賴胡疾而亡薦紳傷嘅熙官茲土素辱公知舉觴致奠來鑒我私尙饗

嘉興府桐鄉縣知縣孫宏軾祭曰越山高兮吳水長上有浮嵐兮下有流光嗟哲人其安適歸兮余將從巫陽而徬徨惟大道之旣隱兮世佻巧以爲悅誰能辨夫子之忠良遇明主而見在田兮竟未及見文明於陬壤彼其超然遠覽之志孤介獨立之操

殆將與黃鵠而比毛翼寧能羣鷄鶩而爭糝糠自古
有志者非壹 夫子至今令人痛傷臨河永訣式奠
椒漿白雲飛過望 公杳茫尙 饗

總理河道右副都御史郭持平祭日嗚呼先生南服
精英弁名鼎甲古道式程經濟弘業忠鯁烈聲爰正
典禮九廟居歆秉國銓衡茹茅彙征尋登宮保篤棊
範型歟歷多蹟 倚注方深云胡不憇遽驂雲乘
九重嗟悼爵諡以榮僊櫬過濟風慘雲陰哀忱薄奠
於昭鑒臨尙 饗

巡撫南贛汀漳右僉都御史陳察祭日維 公海嶽

間氣古今傑士文冠春闈功崇大禮忠結 主知力
洗時弊遜志逆志動求其是天敘天秩職思其居綱
紀清肅珍惜三餘輟樂減騶兩都仰止論道經邦維
其時矣如何昊天生口玉樹察心夙神交蓋傾漳水
一別十年數承高誼日斷江雲淦忘泣涕絮酒空勤
執鞭無計景星懸宵滄波滿地於乎哀哉尙 饗
巡按廣東監察御史姚虞祭日嗚呼 公平而遽止
是耶博洽之才著龜之知耿介之行勁直之氣今則
已矣 公少爲文波濤礧礧蘭省擢秀禮闈蜚英遂
陟上第輔教留京民生豐殖庶弊肅清曾不逾時

聖皇馭極嗟彼眾咻綱常斯敦 公奮不顧爭之惟
力 帝念其忠過加寵錫入登翰苑直簡切螭人謗
且誹 公則不疑炯炯正議霄漢陸離卒排羣喙特
進宮闈乃貳銓衡明揚側陋士類磨濯罔或滯漏爰
典邦禮南服是懋損益古今彰前啟後 帝曰爾來
輔德 青宮稽經訂史勤牖其聰庶幾柄用以底嘉
庸天不憖遺遽嗇厥躬 當宁震傷士民無祿命不
于常云胡其毒第公年逾知命位列九卿行紀 國
史謚請太常傳家有子厥後克昌公可無憾雖亡不
亡肴祗旅陳酌此哀觴思公不見清涕浪浪尙 饗

吏部郎中林春等祭曰於戲 翁兮宛然上升愛而
弗見憂心有冲白玉樓成邈帝鄉以容與明堂棟圯
難師匠之繼登追惟 翁兮天儲爾精地鍾爾靈是
故會昌期而誕生際 明時而顯庸望高北斗文冠
南宮有浩其氣頑懦迺懲有振其響發曠啟矇有相
之道禮樂用興翰林馳譽銓省留聲厯官宗伯 國
典斯明 帝心有在簡弼 青宮豈伊一時之慎重
永言弈世之股肱胡不憖遺淒其以風 聖帝曰咨
權我良臣斃於政成元輔曰猗鮮予協恭靡所與同
士林曰嘻文不在茲道將奚從兆民曰吁匪茲相國

孰悲我窮箕遊莫挽嶺表圖封脉脉廣川悠悠旆旌
蓋將指梅關而南下望白雲以翱翔矣誄詞告奠寧
已於長號乎哉尙 饗

行人司行人游震德祭日嘉靖庚子冬 太子太保
禮部尚書渭厓相公薨於位禮部舉故事請諡贈又
遣震德護公之喪工部郎中顏德倫涖葬事辛丑春
三月十日發京邸秋七月念日實邸南海震德將北
上復 命謹爲文以祭于公之前嗚呼公不可作矣
公奮南服浚明清忠慷慨論建爲時鉅宗欲開太平
欲建紀綱欲君堯舜欲民虞唐古稱賈誼通達國體

公才則然粹而無滓遭逢我 后惇典明倫同寅策
征懋昭聖文公之愛 君言必剴切訐謨遠猷疏章
盈篋公之憂民至誠激中細微幽隱必協于公 帝
罷南狩羣言猶訛抗疏以告民安厥家 朝廷股肱
春官師保天胡不憖奪之壽考 帝哀蓋臣錫諡贈
官命使馳驛載護其棺公在長安杜門絕客震也晚
生春風阻覲昌言峻節中心是藏乃以職事送公故
鄉哲人之亡邦家之瘁遑遑民生孰惻顛躓海月蒼
蒼嶺雲茫茫斯文正氣乾坤堂堂有位有德有文有
子嗚呼 先生允謂不死生芻束帛哀忱孔殷 公

靈不昧庶幾昭臨尙 饗

兵部左侍郎鄉侍晚生黃衷等祭曰惟公以命世之
英才抱康濟之利器始事 武帝抗疏欲濬乎化源
迨事 今上議禮適符乎 聖志嗣是 眷遇日隆
超擢不次六辭宗伯聿崇恬退之風晉陟青宮實踐
清華之地貳銓衡而選法清改南都而邦禮治游登
宮保預輔 儲貳殫平生之丹衷樹敢言之赤幟事
有利於生民知無不言政有傷乎 國體言之不避
迹其獻納之弘多悉歸史臣之載記其關係最大者
則因流言而默止 飛龍之再狩奉 明詔而極論

監國之匪易省億萬供饋之勞綿 宗社悠長之利
此則天下均受其賜而功尤爲俊偉者也善類有所
恃賴姦邪有所畏忌方冀柄用以有爲云胡邁疾而
不起鄉邦興殄瘁之悲 朝廷失股肱之寄觀靈車
之載旋隕士類之涕泗式陳殺核之儀少罄交游之
義尙 饗

直隸滄州知州曾夢祺等祭曰嗚呼惟 公濱海英
儒清時豪傑座應三台心全孤潔知足以達其道毅
足以致其決抗疏千張風生岩穴倡大禮以全天子
至孝遏南巡以完天下命脉君子有所恃而爲善小

民有所賴而綏帖剛毅韓汲忠仁伊說誰謂造物無
情柱石摧折疑丞輔弼兮絕朝廷著龜兮缺黔黎兮
失怙姦邪兮掉舌惆悵兮我心如結

□□□□鄉晚生朱廷亮等祭日惟 公剛毅天
植英特性成垂榮名於鍾鼎溘遨遊乎太清魄落懸
車之夜魂招箕尾之星使兒童走卒收淚飲泣而國
都人士涕泗沾纓嗚呼天實生 公扶翊 國步張
膽明目披肝攄憤志骯髒以回 天屢顛危而不顧
博學雄文星日爭光揮翰草奏烟雲動色鳳凰開五
采之章鷹鷂奮九秋之翼朝攬轡於蘭臯夕憇車于

中域故對公光儀信爲 中朝之吉人而讀公諫疏
謂爲三代之遺直 公昔議禮允愜 聖心乃晉青
宮望重詞林緬惟斯時 郊蠶議起公惟力爭憚不
畏死 皇心弗懌遂下於理處世太潔爲時所忌旣
而貳冢宰執要樞宿弊積姦搜爬無餘園有瘞鹿庭
有懸魚朝士謝及門之謁故人無求薦之書乃晉秩
宗乃出南畿振起頽廢雷厲風飛遭羣言之翕訛亦
獨行而不疑惟 皇思賢日如不及三載底績尋亦
召入公之召入 駕幸南土疏供億之浩煩陳人情
之危苦 天語丁寧不震不怒繼而外議沸騰 公

亦再疏論列敷錫 皇猷宣察民瘼而乘輿不再出
者亦惟 公之力也公勲業如彼忠讜如此天胡使
之厄焉而不究其用尼焉而不竟其志奪之於其終
而若或予之於其始何耶嗚呼比干諫死喬松引年
跖躄眉壽夷隨棄捐天命既去鵬止于軒時哉不來
屈沉于淵固脩短之有數豈人爲之使然亮等與
公同里聞訃淒惻歎不能留哲人於丹青補袞衣之
闕失又不得挂長繩於九天繫西飛之白日聊哀奠
以陳詞恍 靈爽而來格尙 饗

欽差工部營繕司員外郎顏德倫祭曰惟 翁南海夫子

國朝文章科甲擅天下其餘緒爵位列台鼎其微茫
見直者世祖之黜計功者曲江之張謂清耶起廉立
懦謂勇耶 廷斥左禡凡皆知 翁之淺而翁亦不
以此自亮者啟沃都俞致 君帝王反朴還淳躋世
虞唐會精一而病支離啟心學而馭去詞章元首股
肱維明維良 帝親冊命簡在無雙蓋金陵 祖宗
根本之地禮官斯文命脉之綱秀毓 青宮 前星
輝煌顧茲重任匪 翁孰當 帝曰來哉夙駕皇皇
蒙養聖躬一疏耿光保輔丞弼周公成王絜善類之
彙進慨天道之靡常 帝心徬徨方期眷于密勿胡

竟夢於黃梁恩恤禮制庶僚奉以周張蘋藻兮將誠

翁靈兮尙 饗

廣東布政司左布政使楊銓等祭曰惟 公才學超
乎夷等風概本乎天成禮闈首選郎署馳名 聖王
馭極大禮倡明乃入翰苑乃進宮詹乃秉銓軸乃陟
上卿靖共介特侂侂錡錡故或者謂似矯似訐豈休
休有容焉若古名臣之英而不知士心謬戾謏汙盈
行公實憤快嫉厭如鬼如蜮而有以寒其膽喪其朋
俾肅肅雍雍四海隆平也胡然而疾又胡然而遐升
豈嶺表之山川弗耀靈也蓋 國家正直之氣莫有

主盟而人文宣朗之候實占其弗閱是以 皇心痛
悼稽禮宣情贈遣葬祭文敏殊旌夫荷 知遇於生
前沐優寵於沒後固 君臣終始之義盛世昭明之
典不可尙矣是非生人之大幸而 公遭際之極榮
哉銓等夙沾芳潤共籍典型載醴糝酒以罄衷情尙
饗

廣州府知府胡鳳等祭曰嗚呼 公之宏才邃學足
以長民而輔世高風勁節足以軌俗而康時矧迺正
氣本乎天授問學敦於日夜抗壹朝而獨立俯千古
而下之宜台輔之蚤登何大命之倏移俾喆人興云

亡之嘆而 天子軫不憖之悲雖所負之未究而華
問亦足以永垂也鳳等念星霜之忽易仰 靈輿之
載馳聊束帛以象德敬陳詞而獻私英靈如在伏惟
尚 饗

南海縣知縣張峰等祭曰惟公懋德學裕才豐蜚聲
南粵鸚薦雲從文魁天下名動域中筮仕郎署敷歷
青宮繼佐銓曹持明秉公澄清仕籍險隱潛蹤 帝
命眷注迺陟秩宗表儀 朝著四海稱雄正氣天植
允竭精忠進退韓范伯仲夔龍公孤是託倚任方隆
廊廟虛席待奏元功胡天弗吊遂爾高狷 聖心於

邑卹典特崇護喪祭葬義協始終峰等無似夙仰高
風潔牲肅薦用獻涼悰尚 饗

增城縣知縣舒文舉等祭曰嗚呼惟天地惟正氣是
常惟明王惟正氣是昌惟哲人惟正氣是揚 公惟
天授乘氣翱翔以贊天地以襄 聖王大典建大獄
明而禮刑著南巡議羣兇疏而朝綱張君子恃以無
恐小人肅而若藏剛而大直而方翼翼堂堂與山岳
並峙與日月爭光古謂社稷之臣非公其誰可望夫
何 瞳眷方殷而楓宸遽別泰階甫平而天柱遂折
豈天固不憖遺元老使國家猶將借羨於臯契雖然

正氣之在公豈以生而存亦豈以亡而滅其生而在朝也爲霖雨爲鼎石其亡而歸也爲列星爲凝碧然則正氣之所周游磅礴蒸鬱裕茲後昆憑業續績若將等天壤而相倣際王國而匹休孰非我公不朽之遺烈乎文舉等分屬後生職在斯土天設地藏肇茲神道激昂高風草木同鼓肅將麗牲聊攄悃素尙饗

山東按察司副使門下學生張意祭曰惟公兩間正氣昭代偉人受知明主致位孤卿惟公奏疏蹇諤匪躬惟公著述熙載亮工惟公德望漢廷蕭汲

宋魏韓范邦之司直世謂不朽德音與功有壹于此譽垂無窮公于三者咸可不朽疇云公亡在帝左右喜爲雨露怒作風霆神無不之福我蒼生陰翊聖明扶正觸邪兒童走卒聞訃咨嗟意忝門下感恩獨深五內摧裂玄冬晝陰北風長號如助悲咽千里緘辭幽明永訣尙饗

門人侍講胡經等祭曰嗚呼先生其真一代人豪哉方聖帝繼極倫統本天成也二三廷臣首闢異議明正大典萬世綱常賴以攸敘先生贊襄之功也已而廟謨允定帝眷優渥議禮諸臣摩肩柄用先生

獨欣然謂本天經斷自 聖衷臣無力焉遇榮寵而
不居避權勢而不有此其人品高下何如耶正德之
季貪饕成風大臣納汙而不恥庶僚媚勢而自炫先
生起而廓清之障礪之厯官三十載位上卿矣乃身
無華服口乏甘味門絕私謁是其制行峻潔眾楚而
一齊也 國有大事先生毅然身任之而不辭士負
奇氣抱器業則延汲之恐後黷貨蠹民欲置重典以
同古廉靖之風是以志士尊之而不親貪夫畏之而
罔議其慷慨激烈有如此嗚呼先生殊質天縱壯猷
夙成腹笥百氏而品藻有真氣凌萬夫而深沉不測
辟則躋身九霄之上翱翔八極埤視嵩華泮指沆澥
駕風霆於波蕩擊日月於穹窿俾千魅萬怪咸降伏
之而不敢一現者斯先生之自負也嗚呼先生使登
舜夔之堂坐聽韶濩之音則和氣氤氳都俞揖遜之
風成而祥風甘雨之治臻矣迺志大而用未究位隆
而功未顯此又天運之遭逢世道之構結致之也雖
然是天所以全先生也人有持虞敦者適市人莫之
奇淫巧無益之物則爭覩而競鬻之何居物固售於
有識道實顯於通時卽先生用未必能成先生之志
也夫良賈備諸貨賄以善藏也鏞鎛未擊而發鯨雥

雉之聲宛然筍簴以體設而用未量也嗚呼先生逝
矣其孰得而量之哉經等受知門墻亦既有年於其
卒也慨型範之不我作而又幸珪璧之自完也已
兵部主事門生何鰲祭曰嗚呼公以雄才勁節受
知明主天下事獨以壹肩任之真朝野之所倚
重而姦邪之所懾服者也天不憖遺遽爾徂逝世道
之寄將誰賴耶鰲之慟也蓋匪以門下之私而天下
之慟也亦匪以公壹身之故耿耿隱憂伊誰云告嗚
呼廟堂之上有能繼公以身任天下者耶公之神蓋
將籍是爲慰而天下之慟於公者亦將可以少釋矣

悠悠蒼天竟何如哉尙 饗

太子太保禮部尙書涇厓老先生柩行先期門人觀
政進士黃顯等謹相戒執紼從事用申奠告 公其
顧歆哉於戲穆穆燕谷祥車獨復粵山青蒼卜窆允
臧 公心惓惓萬民未燕 精英麗天箕尾朗宣於
戲傷哉春夢芬攘秋雲世類瞻 公恍然錫予長筭
尙 饗

按察司副使門人江以達銘墓

嘉靖庚子冬十月乙丑先師涓厓先生薨于位官至太子少保禮部尙書掌詹事府事銘曰於戲夫不曠世哲人云萎正德甲戌先生會試魁天下先生曰未也非其時也迺去讀書西樵山中辛巳今天子御極先生起爲職方主事又曰未也歸山中君子曰其難進易退有如此者嘉靖丁亥天子特徵先生吏禮兵三部交章辟先生迺遷詹事兼翰林學士先生之初仕也上三劄曰爲學曰爲治曰六官掌故曰四方利弊井然具君子曰太平謨略也非與先生曰人倫不明其何能國南頓濮安天子無父也風染百

世可虞也故疏正 獻皇帝典禮又曰內閣天子股肱僭
而回亂也故疏正楊廷和等以擁立功封伯又曰臺諫天
子耳目黨而恣非禮也故疏正六科給事中褻衣承 旨
其宏綱巨紀風範天下有如此者先生疏曰 祖宗田土
八百萬今半焉可虞也又曰戶口日耗冗食日煩可虞也
河患日滋監政日蠹可虞也君子曰切慮也未之試也久
之 天子命爲講官先生疏辭焉曰坐講廢非禮也又久
之 命爲禮部侍郎又疏辭焉 命爲禮部尙書又五疏
辭焉曰驟進崇階私也臣而私亂也君子曰其退讓有如
此者先生又疏曰哈密不國土魯日驚可虞也朶顏巨測
大同日梗可虞也君子曰遠猷也未之試也先生又曰人
才國家之元氣媚讒好好亂也其何能國故疏薦王守仁
軍功胡世寧忠耿王瓊才略李夢陽康海等文學其舉賢
讓能有如此者識者曰噶沓下石之徒愧汗死矣先生嘉
靖甲午始爲吏部侍郎曰吏部百官首也豪傑棄貨佞公
行亂也疏爲格丙申遷南京禮部尙書己亥遷今宮先生
又曰詹事東宮官也諷太子以儉美德也 四郊九廟七
陵工費靡極可虞也泄泄非禮也迺繪進 聖功圖以諷
天子震怒久之 天子曰念納忠不究又久之天下洶洶
俟 天子南巡百官戒嚴生民奔呼失業先生曰可虞也

疏止之 天子竟不南巡君子曰百萬黎元更生也又曰
遇巷之功也非與先生在朝數十年正色壁立視末世橫
議漠如也而朝廷四方每一舉動必曰先生謂何又曰先
生知之否先生亦曰吾未嘗一日忘天下也先生又曰六
經治之本也故所著曰詩解春秋解則倡而未成曰程朱
訓釋曰象山學辨曰家訓曰西漢編曰文集皆六經之據
証也先生著家訓聯家眾數百合爨食嚴愛勤儉翁如也
故先生曰治天下矩度盡具是矣先生家訓曰霍氏自霍
叔得姓肇居太原中徙南雄元末始祖諱剛可遷南海縣
之石頭村生祖義義生元珍元珍生厚一厚一生華華行

三華生先生五人先生行二祖父父俱贈如先生官祖妣
徐氏妣梁氏配區氏鄭氏俱贈夫人區氏葬于西樵今合
葬者鄭氏也先生諱韜字渭先號兀厓生成化之二十三
年丁未享年五十有四其卒也 天子聞之震悼贈太子
太保賜諡文敏遣行人游震德護喪遣繕郎員外郎顏德
倫治葬遣重臣 諭祭者四皆異數也先生男九人曰璞
曰瑕曰珉曰玦曰珉曰琨曰瓊曰瑩曰瑞瑕登庚子鄉薦
珉琨幼殤女六將以嘉靖二十一年壬寅正月初九日葬
先生于增城南鄉嶺丙午向之原先生之廕曰宗子球先
生日 祖宗之澤不敢私吾子也鄧賁齋氏曰先生居山

中諸子皆躬種漑以讀先生貴二品自奉若儒生君子曰
其恬澹明志有如此者

少保大學士方獻夫表墓

昔者先王之有天下也建極作則定倫盡制以垂一代之
統爲天下後世法者必有出類之才之臣起而佐之故天
命宅而人心安禮制詳而法守定嗣守之主率由以寧三
代以往尙矣我太祖高皇帝再造彝倫一匡皇極聰明
聖哲斟酌損益而又有出類之才之臣起而承之故制作
之善萬世無及焉百十年來承平日久人心日惕法守日
隳積蠹日甚則亦宜有出類之才之臣起而振之上際
聖明之主修明其禮樂率由其典常以復先王之舊若
太子少保禮部尙書渭厓霍公者非其人與我皇上入

繼大統之初廷臣交執爲後之說論議紛然公曰是匪皇祖丕基兄終弟及皇祖制也抗疏論辨與予志合卒定大典天子曰是惟爾諸臣之功其進職秩以成大禮公屢疏懇辭不許乃由兵部職方主事授少詹事兼翰林侍講學士於是錄進舊劄欲皇上法祖宗監成憲也公曰內臣不得與政皇祖令典也先朝大臣壞我太祖之法何可勝言懇懇欲釐正焉未遂也皇上方銳意古禮比隆三代興分祀郊蠶之典公曰合祀皇祖定令也皇后出郊勞民太甚也宮中行焉則其善也乃抗疏力爭預料將建四郊九廟耗費靡極天子震怒械繫御史獄尋詔釋之郊廟成財力竭公憂切于中繪聖功圖以諷天子又怒久之念納忠弗究公疏曰祖宗田土八百萬今止其半又曰戶口日耗冗食日煩冗費日甚蠹弊日滋宜有永圖皆屢疏極言又曰官之失德寵賂章也賊滿貫絞皇祖令典也宜明法以懲貪皆根極遠慮爲吏部侍郎清嚴絕倫賊姦屏迹百年弊局爲之肅清未幾而南轉矣抱志不行識者每嘗太息焉己亥庚子間河汴荆湖萬姓洶洶懼駕南巡公疏其憂勞之狀遂以中止屹然回天之力人謂百萬黎元更生云立朝遇事敢言冰清玉潔直聲震天下百司庶府聞風惕肅人無敢以私

文獻公全集 卷八

于者益公鯁廉勁正由衷率性故威武禍難不足屈聲色
貨利不足移詔諛邪媚不足悅運謀應變不足動由其先
立者大也前後凡四十疏天下生民利病靡不縷悉其立
志在表章成憲引 君子道阜成萬物熙皞太和培 國
家之元氣鞏億年之丕基孔子所謂大臣者以道事君孟
子所謂天民者達可行於天下而行之者也如涓厓公者
非耶公在留都 天子詔還京師加太子少保改禮部尙
書方期大用而公以嘉靖十九年十月七日構疾竟不起
矣嗚呼惜哉公諱韜字渭先號渭厓生成化丁未登癸酉
鄉薦第二甲戌會試遂魁天下乞歸者八年壬午今 上

登極始就職方主事上三劄癸未復疏乞歸與子藏修山
中五年丁亥大禮書成 天子念功與子應召而起立朝
者又十餘年揆厥生年至于沒年凡五十四年訃聞 天
子震悼贈太子太保諡文敏遣行人游震德護喪工部員
外郎顏德倫蒞葬 諭祭四壇皆殊恩也公之先太原人
中徙南雄之朱杞巷始祖諱剛可肇遷南海石頭村生義
義生元珍元珍生厚一厚一生華華行三華生公五人公
行二祖父父俱贈如公官祖妣徐氏妣梁氏配區氏鄭氏
俱贈夫人區先公卒葬于西樵今合葬者鄭氏也子九人
與璞瑕珷珉琨瓊璫瑞也珷琨早殤瑕登庚子鄉薦女

六人諸子皆清修俊挺殆有父風卜以嘉靖二十一年壬寅正月葬于增城南鄉嶺丙午向之原崇封有日矣子與公相麗樵山者十有餘年謹表公立朝大致俾與環等志於用世者知繼述之大云

甘泉子曰傳有之天柱折地維缺女媧氏鍊五色石以補之豈有是理哉或曰荒唐之言也然則女媧氏之志其亦苦矣世有是人乎或曰女媧氏蓋神人也曰豈惟是哉南海有砥柱焉攝提庚子之冬砥柱折狂瀾竭世無女媧氏其誰與補之然則涓厓子其人乎生十有九年而始學其學也一日千里而不怠其自勵也大書居處恭於座隅故他日告君也亦以三字總四勿之秘故其學博而能精其文雄而能昌省薦亞其元春薦元其會權臣勿與殿元也蓋三印卷而三倒置云甘泉子問之文康公憤曰諸老無

尚書湛若水表墓

甘泉子曰傳有之天柱折地維缺女媧氏鍊五色石以補之豈有是理哉或曰荒唐之言也然則女媧氏之志其亦苦矣世有是人乎或曰女媧氏蓋神人也曰豈惟是哉南海有砥柱焉攝提庚子之冬砥柱折狂瀾竭世無女媧氏其誰與補之然則涓厓子其人乎生十有九年而始學其學也一日千里而不怠其自勵也大書居處恭於座隅故他日告君也亦以三字總四勿之秘故其學博而能精其文雄而能昌省薦亞其元春薦元其會權臣勿與殿元也蓋三印卷而三倒置云甘泉子問之文康公憤曰諸老無

子弟在焉安得吉士然而涓厓子以畢姻奏去矣還受兵曹間嘗著尊親大禮私議因上疏辨正得上旨人曰是可以為橫飛直上無所不可者矣故公嘗語進士彭端遇曰吾所不為豪傑者子其絕之是故嫉惡如讐知之必言言之必盡以天下事為己任獨居則背手仰天而視明日又有論建上嘉靖三劄慨官愆也論六科褻衣迎旨正乖黷也論輔臣以迎立封伯止冒濫也上受職疏陳保邦致太平也上治河疏上揀積弊疏上鹽法疏上任大臣疏上任翰林內閣疏抑陰據丞相權也上大臣賊慝上舊制上揀憲職上保聖躬疏上采老臣遺議疏上悼靈皇后喪禮疏

上節費疏明修纂常職也上章服疏上皇后親蠶疏肅內外也上郊祀疏崇成憲也繫詔獄弗悔因以著周頌集解焉上達猷疏上曠大公疏上申明禮制疏上照察姦黨疏上風俗疏上體分疏上定禮制疏上再定禮制疏上欺隱赦旨公文疏上屬官壞法暗通賄賂疏上應詔獻言疏上黜異端疏上清娼籍疏病買良也上聖功圖冊疏曰文王世子問安曰文王世子視膳曰文王世子齒胄曰桓榮授經曰神堯茅茨土階曰大禹菲飲食惡衣服曰大禹卑宮室力溝洫曰周王稼穡艱難曰周室后妃蠶織曰宮中隙地蔬種曰西苑耕稼曰西苑蠶桑曰商王高宗訪道上禁

訛言疏於是聖駕無復南巡焉上民困疏懲官員冒乘驛也爲同食聯居之規恥世分財別籍之偷也嚴請託之戒絕賂貨也蓋欲挽頽俗而還之古以隻手而易天下滔滔之流其亦女媧氏之志謂之砥柱非耶是故與張桂共論大禮張曰其豪傑人矣桂言於朝曰突兀一世矣是故明斯禮也由職方命爲少詹事侍講學士辭命爲詹事兼學士命爲禮部右侍郎辭命爲禮部尙書掌詹事府事五辭命爲吏部右侍郎轉左大吏是戚遂命爲南京禮部尙書加太子少保去矣改禮部尙書掌詹事府事甘泉子曰渭厓公翫麟於斯世適迴於士途可以觀所存矣向使肯隨諸公論禮得殊寵則立談取相夫豈難哉而公之不自欺其心不少屈以徇人足以愧夫鄙夫患得患失者宜表以爲世規公諱韜字渭先渭厓其號生丁未卒庚子享年五十四考西庄諱華贈如其官母梁氏累贈夫人兄隆號老洞三弟曰佑四弟曰任尹先五弟曰傑皆從予西樵山傑居錦岩二年後坐化於觀音山配區氏鄭氏皆贈夫人子男七人璞瑕珉瓊瑤瑞玦若行事之詳則有國史家譜存焉是故不復表著云

刑部員外郎門人何世守述行實

公姓霍諱韜字渭先始號兀厓後更曰渭厓得姓自周封
霍叔家太原其後世自太原徙南雄又自南雄徙南海遠
系莫得其悉五世祖剛可元末長糧運以死勤事高祖義
曾祖元珍並隱德不仕祖厚一號南谷考華號西庄俱以
公貴贈太子少保禮部尙書祖妣徐氏妣梁氏俱贈夫人
公以正德壬申充郡庠生癸酉領鄉薦第二甲戌首選南
宮 廷試仍擬大魁偶封卷中舍倒用銜印更之復爾主
者咸謂天數遂置二甲第一時尙未娶引例告歸讀書西
樵山中丁丑丁酉庄公憂服闋不出辛巳 世皇御極起

爲兵部職方主事仍謝病歸山丙戌陞詹事府少詹事兼翰林院侍講學士屢辭不允遂起赴任丁亥陞詹事兼翰林院學士再辭不允戊子陞禮部右侍郎懇疏辭免又陞禮部尙書五疏力辭乃免己丑充會試考官庚寅丁母梁夫人憂癸巳服闋陞吏部右侍郎隨轉左侍甲午履任丙申陞南京禮部尙書己亥改北京禮部尙書加太子少保掌詹事府事庚子十月七日薨於位 世皇震悼 贈榮祿大夫太子太保諡文敏祭葬如例遣官護喪營兆域始終隆寵無替云公幼有異質年十九始就小學卽大揭居處恭三字坐立相對出則翼然目不旁觀眾識爲遠大器

云甫學踰月四書背誦俱遍師授周易日誦數千言未幾亦遍師驚謂西庄公曰君兒非常人也一二歲間諸經俱旁通子史無不淹貫尤喜大學衍義時有老儒說太極圖聽者如堵公徐登堂辯析奧義老儒驚曰吾不如也時號霍太極云登第後觀政吏部每晨堂揖必着錦繡服或譏之則曰服隨品定 朝廷制也目擊時事雅不樂仕歸娶後遂不出旣起職方感遇明主卽上三劄首論學與政次六部掌故次中外時弊侃侃數萬言通達剴切識者謂賈誼劉蕡不是過也時有議輔臣擁立功封伯爵者有禁省言官褻服迎 旨者公疏論正之有京城守門中官暴奪

商貨聞欲投訴於公則齒指索然亟追還之時多事趨謁公獨執守自重與時齟齬乃謝病歸山疏內有早年色慾過縱血氣虛損之語蓋是時世皇睿齡方少故公陰寓諷諫云居山惟以讀書考古爲業不輕接藩憲郡邑諸僚閒有酬答簡書不襲治生字謂已悞籍朝紳惟天子治之尊不可有二上也大禮議起廷臣咸欲世皇父孝宗而母昭聖公謂天親不可人爲天下未有無父之國若以付昇神器之故而更父母之稱是利天下而忘親不可爲訓辨難周悉然嫌於出位干寵止白之輔相禮官冀可正綱常而全聖孝也主者固執眾口同聲牢不可破公

乃疏陳所見詆禮官執議之失詳辯禮經人後之文兼有二三臣工各陳其說相繼疏進大倫遂正羣議始息世皇覽公奏疏至於泣下悲動左右而公之忠誠簡在聖心矣轉補宮詹兼翰講屢辭不出日不敢以議禮得官也欽命有司守促之始勉赴任公感激異恩知無不言言無不直雖觸時忌弗顧也時天下事大可虞者戶口日耗冗食倍增河防久潰民間田畝半減初額西北不靖哈密單弱土魯蕃驕強朵顏貳志大同梗命公並畫策上陳時議謹之而疏鹽法疏老臣遺議疏救積弊疏保聖躬疏翰林內閣舊制皆關國體而切時艱多蒙採而行之王新

建守仁有奇勲王兵書瓊有邊略康翰撰海李副使夢陽輩俱善文章並坐廢棄公極力薦之且謂臣俱不如也有推賢讓能之風焉奉命充日講官因坐講禮久廢婉疏辭免註西漢書上之張羅峰字敬桂見山萼相繼入相忌者倡黨人之議疏逐二相公謂黨之一字打盡善類能空人國上疏論辯且自求罷斥世皇優旨批答二相遂留而逐其主黨議者時謂公有回天之力焉轉詹事兼學士修明倫大典充纂修官隨轉禮侍禮書俱懇辭免刑部尙書胡公世寧疏薦公孤忠勁節近臣罕儔宜特授都御史仍兼詹事學士專責其論思繩糾則朝有直臣奸慢震肅

世皇優詔答之己丑主考會試簾內外弊剗革殆盡文體爲之一變楊少師博葛尙書守禮程尙書文德唐都憲順之羅修撰洪先楊編修名揚御史爵並表表者皆公所錄士也公諄諭諸士不可以門生座主結私恩而忘大義超俗之見時所僅聞未幾修大明會典充副總裁首撰六部提綱以獻歲省供給冗費數千兩庚寅兩郊議興公援古義遵祖訓力主合祭且移書禮官及夏給事言論辯得失世皇見公執議不同溫旨下諭公執愈堅夏遂以公所移書上之謂有指斥因下公獄章聖太后深知公忠爲之內解會天雨霾三日晝晦武庫震動世皇大悟宥

公天驟開霽人以為忠誠所感未幾聞母梁氏夫人喪回籍守制世皇念公不已忽於儒臣議事別疏內批公忠實深致眷獎服闋起吏侍上大同事宜神箭禮儀等疏俱見允行自以進賢為己職任故秉公論薦不避親讐推陞霍陽奏錄梁次挹俱內舉之人也薦豐熙楊慎徐文華唐樞等皆大禮大獄得罪陸粲則攻擊公與張桂者也舉動光明人咸欽服攝掌部篆僚屬守法惟謹權貴無敢干以私鑽囑之風一時屏息拔淹滯察舉劾調停內外資格不拘更定積歲條例永便遵守吏胥有犯即治無輕貸者私書私儀絕跡不敢至門下謝恩私室者亦無之益公廉之

化人自不敢瀆也先是大選舉監考卷分別五等惟視官職散要為等差不以品級高下為先後也逮呼名與放榜則以品為序迹甚相左遂有售私中變之疑公察其然明揭榜示眾咸帖然舊凡考選言官多取外貌兼之囑賄妨公法紀遂亂故未試而官已先定庸流而濫秩要階比比皆然公惟據考卷取其才識優長者用之故當時人人稱職臺省增重焉其大選舉監亦然凡投選及各項文移吏輩多假駁查送問為騙局公立法當堂明諭奸吏無所措手吏役應撥諸衙門實叅者例俱拈闕以示不私惟吏部及錦衣衛吏則坐名撥缺益皆依託勢要行重賂以圖厚

獲者新舊相代索頂首銀多至千兩公一概闔撥之痛革頂頭之弊文選司有寫本承差十二人皆勢家豪戶買納者日用厚費供司屬宴飲授選日則擇地註官公盡黜革之錦衣吏恃衛官主邏緝能羅織人故橫肆無忌有事則衛官力庇之人莫誰何有吏酗酒毆辱進士羣黨助之訴之臺憲置不問乃訴公公命人執吏送刑曹問如律羣黨棄役逋匿公悉除其名移原籍究之人心痛快衛官斂手前此未之有也公署部篆歲餘宿弊盡滌仕路一清白來名冢宰不是過云往時部事多主於冢宰一少宰不甚與聞誠齋汪公既任公啟以當擴大公無蹈往轍汪雅從公

不自擅自是少宰無伴食者矣夏閣老言屢囑私人於汪冢宰悉爲公所執沮銜恨愈深因府尹劉淑相發夏言賊私夏疏辯論劉不當遊銀山暗波及公而盧庶吉梗李給事充濁胡御史守忠輩聽夏指使先後誣捏論公賴世皇知公不爲惑而公亦竟無損焉夏憾不已百方擠之不遂值南禮缺夏遂謂公資望當補益擠之出也先是南六科官途遇南六卿不避馬公會聚議相與敵禮歲時拜萬壽牌拜進表箋俱乘馬突儀仗鼓未嚴時則大宗伯朝服搢笏送茶每季終六卿具職名手本送科註銷公論其越分慢君莫此爲甚而搢笏送茶職名註銷非臣所宜

受並疏正之其諸施爲建白若拜牌更十二拜之禮制帛
嚴導送之儀擬差小九卿之進箋議革小京堂之用轎察
百執事之拜 孝陵論劾劉監承之衝儀仗此皆關係禮
儀之大者禁送喪之設宴飲絕婦女之入庵院罪樂戶之
買良人毀淫祠建社學散僧尼建祠表岳武穆何尙寶之
忠節給田表藁谷王都憲之清貧甄別應天鄉飲之賓介
援恤忠臣花雲之弱孫此皆關係風化之要者也禁諸司
之強買貨物除夫役之守宿私衙查坊長之供辦酒席省
地方之賃倩桌椅禁樂工之日辦茶果核開讀之恤老實
惠此皆關係民隱之切者也僧道嚴私度之禁神樂汰樂

舞之生職掌所關無不留意崔文敏有云渭厓南都舉動
真禮部尙書也有富家廣置宅舍假住縉紳不責賃租而
巧局取厚利公移文南憲院查沒以建官舍南人快之有
謫任言官官箴大戾而夤緣復官有行取大尹不堪風憲
擢補吏部有文選郎中賄復寫本承差俱恃冰山千紀者
公併疏論劾愼穢縮首公涖南都二載風望凜然羣工歛
戢豪勢震懾小民受惠雖兒童走卒婦人女子無不知頌
霍公霍公云是時土木煩興工費靡極公轉官僚遂進
東宮聖功圖以諷雖未奉 俞旨然以納忠不罪也官舟
北上不欲勞民儀從落落有誤犯之者既覺猶以爲僞乃

日尙書聲勢豈若此乎南都設有黃馬快船歲載時品及
供御物進京師船卒藉中官勢凌害驛遞沿途甚苦之公
日擊其事卽移文部院及所司痛治之其後稍戢入弼
東宮會訛言 聖駕復將南巡有司科歛預備遐邇皇皇
公請 明旨榜諭之且論前扈蹕及護送 聖母梓宮諸
臣受賄擾民之弊事遂中寢說者謂百萬黎元更生 世
皇一日忽內出監國之諭公與楊太僕最具疏先後上公
疏獨留中公嘗建議職官犯贓滿貫應死罪者仍擬眞犯
正法市曹以警貪墨聞者吐舌惜未之行也公自筮仕以
至宮保疏凡九十餘上諸辭謝題復不與焉皆關係 君

道人倫國體世道嘉猷可傳可久百禩罔愆者也公重瞳
虬髯風格峻整性孝友事西庄公梁夫人曲盡子道其沒
也哀毀骨立見者憐之兄弟和氣怡怡無少閒隙教諸子
惓惓於忠孝仁義不令服華美飫肥甘亦不令受僮僕尊
大之稱寒暑所更衣時令自浣書暇則令耘草灌園愛諸
姪如其子三品秩滿任子恩移廕小宗長姪聚宗族合食
凡產業俱統于一租稅所入伯兄振先掌之以均族眾所
得俸薪亦以均之不自私也合族內外循禮守法家政斬
然旣貴卽飭家眾不令干外事凌鄉里旣顯益加嚴飾仍
著訓以訓於家可永垂世範焉生平極篤故舊甘隱士學

陳隱士公贊俱貧賤交也貴顯後皆以子婚其女張羅山
沒後權貴頤指凌其後人公倡義極力保護哭張辭有云
吾後死者決不負羅山也又如重理學名臣力舉章楓山
之恩廕執公議出周推官於死獄犯權寵辯劉府尹之寃
誣望哭故人鄧訓導之亡追還故相梁厚齋之產此皆今
人所難者公視之則爲細事耳官至宮保衣無重綺食鮮
珍味見士夫侈靡者深鄙惡之多有慚而化者喜引進後
學有美質高業者必延以隆禮極力薦揚多所成就不肖
守與五河沈憲副應乾俱承公收錄親視其業丁酉科應
天鄉試放榜之期公夜達旦以待報逮聞落第親臨慰籍

此皆古人高誼近世寧復見之客至私宅雖士類必令出
入中道揖拜令如禮不使作僂偃罄折之狀至惡惡人則
真如蛇蝎不少假借也每草章奏數千萬言下筆立就不
復點綴作古文詞自出機軸絕無蹈襲每就楮則飲酒數
觥掀髯揮筆頃刻成篇悉膾炙人口詩祖三百篇間法漢
魏盛唐然不多作其議論率皆直截不苟徇人不取陸象
山之學周禮至王莽時始出深斥其爲僞書皆獨得之見
也所著有書解詩解春秋解西漢書稿藏於家程朱訓釋
象山學辯兢兢集俱梓傳周頌解則繫獄時筆也奏疏詩
文諸作梓有全集世並珍之公未第前壬申歲中秋夜西

庄公夢得詩句云今年此夜月團圓明年此夜定魁元若
教春景三光在照破江南一洞天又云香飄紫府三秋滿
水浸青雲萬里橫明年公領鄉薦又明年魁南省蓋天生
豪傑爲世禎瑞鬼神先發其機不偶然也廣之英德江中
有怪石爲患眾神之創廟祀焉公毀其廟未幾雷亦擊去
其石洪濤驅沙江爲安流清遠飛來峰有虎患公移文山
神虎遂絕今其文豎寺中世呼驅虎碑蓋公之精誠正氣
足孚鬼神故感應如響也守憶侍公教時公閒言夏閣老
言及嚴禮書嵩俱不得其死是時夏寵方隆嚴奸未露守
疑公言過甚公曰秀才寧識此機第記吾言也後十年夏

誅又十年嚴敗不得其死噫李文靖真聖人公非其儔歟
公生成化丁未四月二十一日年五十有四配區氏繼鄭
氏先公卒俱贈一品夫人鄭夫人卒時有旨賜祭葬公
懇辭免貳室呂氏老氏呂氏以子與瑕貴封安人子男九
長與璞庠生公薨後二年卒未娶次卽與瑕己未進士甚
有公風尹慈谿多善政不畏強禦觸忤權貴落職慈民思
戴爲之立祠今上登極以薦起補尹鄞縣擢南京太僕
寺丞娶甘氏卽甘學女與珉王府典儀正娶羅氏羅叅政
烈女與珙庠生娶倫氏倫通政以諒女與璽戊午貢士娶
何氏何都憲經孫女與璿庠生娶梁氏梁方伯廷振女與

瑞庚午貢士娶陳氏陳憲副善女與珺與琨俱早卒璞珅
鄭出瑕瓔璫呂出珉瑞老出女五人長適同邑舉人陳萬
次適增城湛涼之甘泉湛先生季子次適清遠黃士登次
適順德張雲節次適泃主政桂奇之子泃夢竹今有孫男
十二人長若祖次若禮若袖若禎若祥若裕若禧若祺若
禔若祐若禔若禔孫女十一人公未恙時璞珅俱遣歸廣
應鄉試疾既甚屢嘆曰死定數耳只不得口授二子以千
年絕學濱危不能作字令人代筆遺書兄弟令謹守家訓
又口稱天地間道理五字語不及他未幾遂逝訃聞上
嗟悼遣禮部侍郎馬汝驥致祭行人游震德護喪南歸以

壬寅年正月初九日 諭葬於增城南鄉嶺工部郎中顏

德倫布政司叅議徐九臯奉 命董其事先後 諭祭四

壇會葬者二千餘人公既沒海內士夫無問識與不識罔
不惜之旅視南還時士大夫有徒步數百里外撫棺痛悼
者守聞訃遙哭於廉直祠之表忠堂南都士民知而至者
無不嗚咽泣下謂天不陰隲下民奪公若是之速也是可
見君子感人之深盛德難諉之實矣自茲以後在位君子
固不乏人而世變下趨邪佞羣起貪婪如市軟滑成風奢
靡相高奔競不耻銓司鬻爵科場賣題從仕者假貨以干
赴任者債家同往無復公立朝時氣象矣戊午己未間嚴

氏權勢益盛其稚子家僮悉能役使冢宰司馬每有選授陞轉必候其父子頤指或中貴口角或孔方面皮不爾且姑擲之矣識者每奮惋嘆曰渭厓公若在位世道寧至是耶其時守給由銓部日見吏胥家僮索賄堦下名曰討禮兒雖冢宰後堂泣事司屬幕廳集候不之畏也且曰今上下皆然爾卽訴之吾何休焉士夫並仰天嘆曰渭厓公秉銓時奴僕敢若是耶南都民間自公北轉受害無異昔時民並垂首泣曰霍公在南時吾曹豈若是耶噫是可觀公之大概矣公以貞心浩氣正學宏才言人所不敢言爲人所不能爲使得位躋輔相大展經綸其所建立又不止此

惜乎遭際已奇任用方篤而奸人間之於前百計擠之於後使公治平之術不得盡展豈非天乎然賴 聖明洞察終始保全雖公之忠誠足以結知 聖主然天扶社稷佑助忠賢顯道昭彰不可掩也說者謂公之踪跡類張曲江誠知言矣嘗聞薦公者有曰剛正不阿忠直有識志守祖宗成法力挽後學頽風贊公者有曰明敏之識宏博之學峭崛之氣昌大之才以孤忠直節受知 當宁摧於權奸而不顧憎於眾口而不惑又曰腹笥百氏而品藻無差氣凌萬夫而深沉莫測夷考其行若身躋九霄目覽八極埤視嵩華潏指沆澥駕風霆於波蕩擎日月於穹窿百怪

羣妖逖匿無迹嗚呼此並公之實錄也百世之下誰能易
之_守之說固不足爲公輕重也



